

雍正上諭條例

元年正月  
同 十二月



					漢書門
				五	
			二	四	
		四	七	八	
		冊	架	函	號

					內閣文庫
三				五	漢
八				一	書
七			二	二	
函			冊	冊	架

內閣文庫	
番號	漢 5123
冊數	24 ( 2 )
函號	287 16





雍正元年正月

上諭二十六道

初二日

諭戶部恩賜老人原爲崇年尚齒而地方賞老人者每  
州縣動支數千金司府牧令上下通同侵扣吏役復  
任意需索老人十不得一上負曠典罪不容追今飭  
令督撫嚴查務令有司親自沿鄉訪察照看據實造  
冊給發不許絲毫侵扣如仍蹈前弊立即叅處如督  
撫奉行不謹朕若訪出必加以失於覺察之罪再老  
人九十以上者州縣不時存問其或鰥寡無子及子  
孫貧不能養贍者督撫以至州縣公同設法卹養或



奏聞動用錢糧務令得霑實惠

初三日奉

上諭前年因黃河衝決

皇考特遣牛鈕齊蘇勒等堵築修理堤工一切完竣交與楊宗義乃楊宗義不能時時加謹防守致修築之處又復衝決經九卿議將楊宗義革職拏交刑部從重治罪

皇考未卽將伊治罪從寬恕免將一切河工俱交與伊令其効力贖罪今被衝決之堤工俱已合龍似屬成功仍着交與楊宗義加謹防守不時修築春日水融之先務期預爲防守堅固斷不可似從前疎忽又致衝決果能加謹防護卽可贖其前愆如將已完堤工再致衝決朕必重治其罪

初四日總理事務王六臣等議奏八旗官兵米石應准倉場衙門所請將所有六七成米折算添給支放奉

上諭所給之米照伊等所奏米色微高尤善如不及所奏米色支給務將倉場大臣該倉監督從重治罪  
初六日奉

上諭舊大臣內原任大學士阿蘭泰王熙李光地原任尚書趙申喬伊等俱係在

皇考時宣力効忠之人作何追恤加恩之處總理事務大



臣會同大學士白潢尚書張鵬翮左都御史朱軾查  
例議奏

初七日

上召來京叩謁

梓宮之科爾沁達爾汗親王和碩額駙羅卜藏固穆布等

入

養心殿

賜茶奉

上諭爾等先世俱在

太祖時歸誠効順竭力同心誼若一家懋著勤績爾等皆  
淡泊

皇考加恩愛養之人今聞

皇考升遐相率匍匐奔謁

梓宮哀號擗踊朕心深為憫惻仰惟

皇考視爾等如子孫於茲六十餘年恩隆情篤今

龍馭上賓屬大位於朕躬朕仰承

皇考付託之重當視爾等亦如一家深加愛養爾等皆仰  
承

皇考恩養之人

皇考雖已升遐朕嗣大統一如

皇考在位爾等亦宜感念

皇考深恩和衷共勵竭誠効力於國家再爾等衆扎薩克



等俱有辦理旗務統轄衆庶之責旗下人員皆係爾等下屬凡事務期秉公矢慎各撫恤爾屬下人等慎勿擾累

十二日

諭理藩院策凌東洛卜著封貝勒連歲西邊軍興青海王以下台吉等以上各著勞績

皇考曾降

諭旨於凱旋之日議敘著總理事務王大臣與議政大臣等將青海王台吉等歷年功績公同查明作何加封施恩之處定議具奏

又

諭署直隸巡撫趙之垣河南巡撫楊宗義朝廷設官置吏原以養民遇有災荒卽多方撫恤方不負委任之重今據山東巡撫黃炳奏稱直隸河南鄰境小民資生無策間有攜家就近覓食者朕覽奏惻然當此春初農事方興若任其流離則小民何所依歸著卽遴選賢員招輯復業核實賑濟務令得所勿失農時仍督飭文武官弁稽察奸慝以安善良方副朕惠養元元之至意

十三日理藩院以來謁

梓宮之蒙古王貝勒貝子公額駙台吉等奏稱世受

國恩至爲深重不忍卽歸擬住京師候送



梓宮安奉

陵寢享殿等語轉奏奉

上諭候送

梓宮尚須兩三月若去而復來殊屬勞苦時當春季馬匹必致羸瘦來而復歸必更艱難矣著照王等所請在京候送

梓宮俟安奉

陵寢享殿禮成後令回本地至九月內

梓宮安奉

地宮伊等必復來送正值秋草馬肥可即從伊本處前詣陵寢是時朕亦必往

陵寢也

十四日奉

上諭各省奏銷除地力正項錢糧及軍需之外其餘一應奏銷積弊甚大若無部費雖當用之項冊檔分明亦以本內數字互異或因銀數幾兩不符往來駁詰不准奏銷一有部費即糜費錢糧百萬亦准奏銷或將無關緊要之處駁回以存駁詰之名掩飾耳目咨覆到日旋即議准內外通同欺盜虛冒此等情弊盡在

皇考睿照之中

聖恩寬大未行深究朕今不得不加整理嗣後一應錢糧



奏銷事務無論何部俱著怡親王隆科多大學士白  
潢左都御史朱軾會同辦理

十五日

諭九卿朕受

皇考付託之重撫育羣黎夙夜孜孜惟恐閭閻失所昨山  
東巡撫奏稱東兗二屬上年二麥失收小民未免困  
苦直隸河南鄰境之民資生無策亦有攜家覓食者  
朕覽奏惻然比卽飭諭直隸河南巡撫加意撫綏招  
集復業但兩省巡撫並未奏聞朕恐其視爲泛常奉  
行不力爾等可會同確議或特遣大臣或交與該撫  
作何賑濟安輯之法務使窮黎得霑實惠又前歲河

南黃水潰決汎溢於直隸地方比年以來兩省近水  
居民耕種無資衣食匱乏均應加恩撫恤爾等一併  
議奏

又

諭戶部原任兩江總督常胤劾奏兩淮巡鹽御史張應  
詔科派加餉銀兩經工部尚書李先復等審明覆奏  
爾部駁詰以爲加餉銀兩去年衆商旣已供爲張應  
詔所派今常胤身故衆商遂改前供所審未爲允協  
朕聞常胤居官本無令名

皇考亦曾向朕言之其所奏豈可爲準

皇考當日不肯據常胤所奏定案故遣大臣前往察審今



既已審明不必再行駁詰況張應詔本無科派之事  
眞實難掩衆商安得不改易前供乎至於商人欲以  
此項銀兩充餉朕豈需此其已交十三萬餘兩准其  
抵算往年商欠其未完銀二十餘萬兩盡行豁免我  
皇考恤商愛民若辦理此事亦必如此歸結也至於衆商  
歷年所欠正項關係國帑應作何限年徵收之法爾  
部確議具奏

十六日奉

上諭八旗舉人生員內有在護軍執事人行走者俱著  
退回若係生員給與二兩錢糧米石係舉人給與三  
兩錢糧米石令伊等得以讀書

又奉

上諭八旗滿洲人等除照常考試漢文秀才舉人進士  
外至於繙譯技勇亦屬緊要應將滿洲人等考取繙  
譯秀才舉人進士并武秀才舉人進士著總理事務  
王大臣等會同該部將作何考試額數多少之處定  
議具奏

又

上以莊靖親王薨逝降

旨臨奠諸王大臣等懇請停止奉

上諭王大臣等所奏雖是但朕之長輩止有莊親王一  
人宗親誼篤朕心必欲親往著宗人府並有執事之



王大臣等隨往其餘不必前去

二十三日

諭總理事務王大臣提鎮副將俱係

聖祖仁皇帝簡用之員特將

聖祖仁皇帝所遺弓矢纓鞬等項寶物賞與伊等所賞物件伊等應作何敬謹領受迎接供奉將

聖祖仁皇帝恩澤貽及子孫累世永戴之處爾等會同兵部議奏

又

諭工部去年黃河漫溢衝決秦家廠一時不能堵塞朕念數省生民暨東南漕運攸關特遣齊蘇勒前往堵

修幸將秦家廠馬營口俱經堵塞完工但冬日冰凍所修工程或未必堅固目今冰解流漸之時水勢定行稍長況三月桃花水降其堵築堤岸不可不加保固今楊宗義丁憂布政使牟欽元署理巡撫印務凡齊蘇勒所需河工物料及所用官員著牟欽元卽行給與毋得遲誤該部速行文牟欽元知之

又

諭直省主考官爾等俱係

皇考選用之人朕諒爾等必能自好是以特簡為主考官爾等到彼處務至公考試取其真實學問優長者爾等果能不徇私聲名好則不但無負朕之選用亦不



負

皇考愛養之恩矣回京之日朕自加陞擢如有徇私之處  
經朕訪聞定行從重治罪決不寬貸

二十四日奉

上諭從前每逢考試常有無賴匪類生事擾犯此風斷  
不可長著總理事務王大臣傳諭該管衙門考試之  
前卽嚴行曉示倘有此等無賴匪類務將爲首之人  
從重治罪以示儆戒

二十六日

諭都統阿拉錫理藩院尚書特古德爾等傳旨與策妄  
阿喇布坦之使人曰爾之台吉在我

聖祖皇考時雖有微勞亦多罪戾又無故侵我哈密發兵  
往昭殺害喇藏毀壞佛教惟天子統御萬邦理宜興  
師問罪我

聖祖皇考至仁如天祇陳師邊境俟爾台吉深悔前非卽  
加恩寬宥並無意於殄滅爾國也其後因澤卜尊丹  
巴胡土克圖再三請赦策妄阿喇布坦之罪我

聖祖皇考念其舊日微勞又憐念胡土克圖老人懇請特  
允所奏許令遣使往諭策妄阿喇布坦待其伏罪陳  
奏到日卽降

恩旨今

聖祖皇考升遐朕繼承大寶胡土克圖老人遠來再爲奏



請故復遣使於爾若爾台吉即使親信之人誠懇陳辭朕卽寬宥以寧爾土宇若真頑不靈特欲構兵亦可明言其意欲廣我

聖祖皇考之仁恩亦在爾之台吉欲振我

聖祖皇考之武烈亦在爾之台吉朕仰承

聖祖皇考之心以行我朝兵威亦爾台吉所知也今胡土克圖大喇嘛又已圓寂從此亦無有爲爾台吉奏請之人矣可作速定奪具奏若仍前支吾則兵自爾起無與朕也因爾非專使不與爾勅書爾其謹識朕言往諭爾台吉

二十七日奉

上諭前引見滿洲翰林之呂因成文行止不端特加訓諭成文妄奏不知所陳何語近朕令諸翰林各據所知條奏成文奏摺內有興利除弊等語

皇考聖治又有何弊朕何以除之伊又奏請八旗十五歲以上俱令讀書如此則挑取護軍之處復用何人所奏無一要款恣意瀆陳又復懇辭教習二十阿哥之職人甚狂妄膽大著革職跟隨二十阿哥行走若能改過則已若仍不改必鎖拏監禁

又署直隸巡撫趙之垣題請領賣通倉變色米石戶部議覆准行奉

上諭此案係朕親率爾等辦理之事



皇考因直隸各州縣內有米穀短少之處將通倉變色米石糶賣於民有益並非勒令每處著落糶賣若干不但水次遙遠之州縣雖近水次之地若於民無益亦不勒令糶賣今趙之垣不能領會

皇考原降諭旨之意以二百里以內附近水次之州縣派定數日糶賣具奏如此不但無益且又多此一事戶部卽照趙之垣所議准行甚謬此案無庸另批著曉諭趙之垣將此項變色米石於米穀短少之州縣領去糶賣若於民有益卽行領賣若領運繁難無有益處卽行停止如民間有因米穀短少情願赴通糶買此項米石自行運回者亦聽其買去

又兵部以三等侍衛李景泰擬補雲南提標右營守備引

見奉

上諭李景泰係直隸人伊母年邁雲南地方甚遠著以山東河南地方守備員缺補用

二十九日奉

上諭鑲黃旗護軍叅領赫色常格正白旗護軍叅領赫達鑲白旗前鋒叅領費揚古護軍叅領巴爾泰此五年年已老邁皆曾多年効力軍前著以原品致仕准食半俸各賞銀五十兩

三十日



諭山東巡撫黃炳朕繼承大統父母斯民普天之下皆  
吾赤子凡身任封疆者當深體朕心遇有災荒及時  
賑濟使窮黎實被其澤據奏東兗兩屬去歲二麥失  
收小民未免困苦直隸河南鄰境之民資生無策亦  
有携家覓食者朕覽奏惻然爾奏欲各捐已貲以爲  
賑濟朕思爾等貲從何出勢必仍取之於民是賑民  
實以累民也不如動川倉儲遴選賢員確查乏食窮  
民分路賑濟小民庶得均霑實惠至鄰省流移之民  
亦宜一體撫恤毋令失所又奏請平糶倉穀於民食  
大有裨益必得實心任事之人方副朕惠養元元之  
意再奏請漕糧十萬石分貯各縣往年曾經屢次截

留此項曾否支用所存多寡併如何分貯之處著具

本奏聞

又

諭山東巡撫黃炳山東運道淺阻舊例派撥民夫挑淺  
濟運朕思東省連年薄收百姓困苦未必堪此重役  
將來流亡日多民生口蹙深爲可憫古人救荒之策  
有大興役以濟民食者不若竟動正項錢糧僱募民  
夫給以工食挑濬運河則應僱旣多散者復聚民資  
工食稍延殘喘民心鼓舞工程易就運道早通於興  
役之中卽遇賑濟之意莫便於此已有旨命佟吉圖  
署理按察使速赴河南與總河齊蘇勒商定回任料



理運道俟其到日爾可與公同竭力料理務使小民得霑實惠

又戶部議覆審理兩淮鹽務工部尚書李先復覆奏一疏奉

上諭李先復等所奏兩淮行鹽國課攸關凡關鹽務之事督撫理應會同該御史酌量料理等語部覆定例遵行已久應無庸議但督撫與該御史如相和好卽長鹽價以致病民如不相和好卽不巡緝私鹽以致累商嗣後倘各有意見著將情由達部聽部定奪

雍正元年二月

上諭二十五道

初二日

諭總理事務王大臣等凡事當做法

**祖宗成憲**方爲盡善

皇曾祖妣孝莊文皇后大事當發引時

皇考親自恭送

皇祖妣孝惠章皇后大事發引之時

皇考聖躬違和足疾甚重尚且

親送

梓宮啓行諸王大臣豈能勸止乎朕今親送



皇考梓宮至

山陵朕意已定諸王大臣勿再強奏

又辦理土默特事務刑部郎中福住等奏披甲阿納等盜牛二頭照例立絞奉

上諭偷盜一二牲餽卽將蒙古立絞人命重大嗣後應定擬絞監候之罪爾等遵旨暫行一年與往年盜案相較若蒙古從此盜案漸少則照此例行倘蒙古無知法輕多玩而盜案比往年較多則仍照原定之例擬罪

初四日

諭禮部陳鵬年潔已奉公實心爲國因河工決口自請前往堵築寢食俱廢風雨不辭積勞成疾歿於工所聞其家有八旬之母室如懸罄此真鞠躬盡瘁死而後已之臣傳諭該撫賜司庫銀二千兩其母賜以封典陳鵬年賜以優謚以一品廕其一子

初五日奉

上諭國家養育人材首重翰苑旣讀中秘之書必當立品端方居心敬慎方爲不愧官箴聞有僥倖之徒平昔結黨營私至科場年分則互相援引轉爲請託遇謹守之人畏干法紀不肯通同作弊反羣相排詆飛語誣陷此風甚不可長亟當甄別勒令解退回籍以示勸懲著大學士張鵬翮尚書田從典徐元夢朱軾



侍郎張伯行李紱會同滿漢掌院學士將翰林院詹事府官員有不安分生事有玷官箴者指名具奏不可徇情

初八日

諭吏部直省教官專司訓迪士子今年幼不通文藝之人捐補敎職卽爲年長學優者之師可乎伊等旣已捐納應照其品級補用別職之處該部議奏

又

諭吏部嗣後銓選月官內有應補應扣者各將何以應補何以應扣之故明白曉示衆人庶使人心允服

初九日奉

諭左都御史朱軾係

早考簡用大臣居官素清朕纘承大統以來實心行走孝行昭著聞伊家有八旬之母恩詔內應封夫人著加賜一品夫人封典并賞該省藩庫銀二千兩爲伊母養贍之資

初十日

諭總理事務王大臣諸王大臣等外間匪類捏造流言妄生議論謂朕鍾愛十六阿哥令其承襲莊親王王爵承受其家產朕爲君上多封諸弟數人爲親王何所不可而必藉承襲莊親王以加厚於十六阿哥乎現今廉親王怡親王履郡王朕皆封以親王郡王矣



不特此也大阿哥之子弘昉一閒散宗室而現居親王邸第豈伊本分所應得乎朕欲於諸弟內擇一人封親王令居右翼尚且不得其人而小人議論乃如此且如發遣一人卽議朕報復舊怨不知其人自犯凌遲重罪本無可生之理而朕特寬貸其死也又如擢用一人卽議朕恩出於私以新進加於耆舊之上今諸大臣具在歷年以來誰是朕藩邸往來者如其有之能揜衆人之耳目乎如朕所用佛格尹泰等於朕何私之有皆朕平日素不相識之人也佛格係宗室輔國將軍品端學優在

皇考時無薦舉之者故未錄用朕聞其人可用擢伊尚書特欲有裨於政事耳朕前歲往盛京時始識尹泰之面見其爲人甚屬明達伊係四格親戚或向曾在二阿哥處行走一二次亦未可定

皇考惜其材品不加罪責授伊盛京佐領置之閒曹而已凡經

皇考治罪者朕又何嘗錄用一人乎卽欲評論伊等亦待兩三年後果其劣跡昭彰然後可加指摘乃畧無所據卽以朕所用之人爲非何其狂妄古者殷高宗舉傅說於版築之間朕爲天子簡用所知之人乃人君分內之事臣下何得妄議也勒席恒者儉邪小人伊父蘇努係七十之黨結爲生死之交舉國孰不知之



七十等朋比爲奸搖惑人心擾亂國是朕於蘇努父子宥其罪戾疊沛恩施封蘇努爲貝勒授勒席恒領侍衛內大臣御前行走亦冀其感念朕恩悛改舊惡豈朕畏懼伊等而然耶勒席恒不但不知感戴而且心無饜足仍然結黨營私護庇貝子允禔代爲支吾巧飾將朕所交之事顛倒錯謬將朕所降諭旨任意增減致諸王大臣每事掣肘難於辦理又朕諸弟兄家有奸惡太監數人種種引誘伊主伊主不法之事皆由伊等而起朕若明正其罪詳審究擬則牽連甚多伊主亦不可當朕念兄弟之情特欲保全不加明訊將此輩奸惡小人免死發遣以消釋其事曾謂勒

席恒曰此不過懲治家下惡奴其事甚細不必存記檔案而勒席恒顯悖朕旨記載檔案其意特欲後人疑爲事不明白漫將數人治罪以此不令之名歸之於朕也勒席恒於

**皇**考時並無竭誠効力之處其爲朕効力又復如此乃敢以懇給佐領冒昧陳請狂妄悖謬至矣極矣勒席恒不但不可在內廷行走并不可在外廷行走著革職發往西寧以便伊跟隨允禔爲其効力前大將軍王允禴未到京之時衆人意甚恭敬旣到京之後恭敬者轉爲怠玩朕不知此等下愚何所見而然我朝舊制行軍之處必派王公等前往大將軍王允禴到京



後未定應行回任與否是以諸王大臣議請將貝子允禔派往軍前駐劄西寧此不過為國家邊疆起見允禔怠慢不肯起程奏云俟過百日又云俟

陵寢回來後起程屢次推諉耽延時日誠屬何心朕所不解朕曾詰允禔曰爾不願往豈不顯背朕旨乎且允禔之太監何玉柱一至微至賤之人而使有家產至數十萬伊家何人不可用而用一漢給事中秦道然為伊府管領豈非欲圖大事耀內廷太監以財利而要外廷漢人之稱譽乎如此作為朕即明正其罪禁錮高牆有何不可即置之極典亦有何不可朕今並未革其貝子降其俸祿撤其家奴也代伊懲治家下

奸惡太監反謂朕凌逼弟輩揚言無忌悖亂極矣諸弟兄受朕委曲保全之恩不思圖報日每淆亂朕心激朕之怒爾等若自謂忠臣孝子悌弟並無干犯國法之處朕即明指所犯之事宣示於眾朕屢屢寬宥並不知感而反議朕凌逼弟輩有是理乎朕受

皇考弘恩歷年身居藩邸享安閒之福登極以來不辭勞瘁事事必求至當治益求治安愈求安誠以

皇考付託神器至重思欲仰副

皇考知人之明否則如前安逸可也何苦乃爾勞瘁耶爾諸臣理宜感發天良靖共爾位體朕宵旰勤勞以期

仰副



皇考知人之明之志同心協力翼贊朕躬俾每事必出於至是斯乃爾等之職分今輒欲與朕各執其是意欲自居於是而居朕於非乎朕爲普天率土之主爾等莫非臣下若任爾等之縱恣朕何以對

聖祖皇考乎魯論有云三年無改於父之道可謂孝矣朕受

皇考鞠育教誨深恩四十五年今承大統惟思永永無改何止三年此念出於至誠朕之弟兄及諸大臣一切過犯無不施恩寬宥豈意衆人並不知感百日之內淆亂朕心者百端伊等其謂朕寬仁不嗜殺人故任意侮慢乎此啓朕殺人之端也夫啓朕殺人之端者

其人族滅猶不足以蔽其辜矣如陳夢雷罪大惡極朕尚詢問九卿大臣云陳夢雷如應寬宥爾等秉公具奏僉云陳夢雷罪大惡極斷不可留應行正法朕猶免其死罪將伊一切惡款俱未詳究止坐以發遣之罪繫獄待遣孰知陶賴張廷樞竟將陳夢雷二子擅自釋放陶賴張廷樞之罪甚大朕猶欲保全大臣免其治罪止以降級結案詎意伊等心懷怨憤謂大臣等及朕御前行走之人凡事何必奏聞夫有事預先奏聞朕猶得爲之潛消默化倘事端初起不卽奏聞迨至彰明較著方始具奏不但於事無益且必連累多人矣况奏事止論虛實豈可漫以奏聞之人爲



非其以為非者特欲壅蔽朕之耳目也朕承

皇考大統自臨御以來諸王大臣人人得享太平之福朕並無此時姑且容忍待一二年後漸加誅戮之心如朕果懷此心

天地

宗社

皇考神靈鑒之爾等各宜砥礪勿失臣節敬謹遵奉君上果能悛改惡習竭力供職一二年後言語面目之間必有誠於中而形於外者朕自必知如不悛改不思皇考六十餘年教養深恩不感戴朕保全寬宥之意妄生事端干犯法紀似此犯法之人朕斷不寬宥必行正

法前者睿親王將伊同列之王誅戮伊不過攝政王耳如四輔臣時伊等欲誅何人不可朕雖庸懦既為人主何難將犯法之人正法使朕推廣

皇考之仁慈唯爾等自勉之使朕昭宣

皇考之天威亦爾等自取之朕之諸弟及諸大臣應知朕

仰體

皇考聖心仁愛思欲保全爾等之意出於至誠務必成全朕之孝思各自竭力供職慎毋干犯國法

十三日

諭禮部致治之要首在風化移風易俗莫先於鼓勵良善使人人知彞倫天則之為重忠孝廉節之宜敦古



帝王勞來匡直所以納民於軌物者舍是無由也朝廷每遇覃恩詔欵內必有旌表孝義貞節之條實係鉅典邇來直省大吏往往視爲具文並未廣諮遠訪祇將有力之家囑託賂遺者漫憑郡縣監司之申詳卽爲題請建坊而山村僻壤貧寒耕織之人或菽水養親天性篤孝或柏舟矢志之死靡他鄉鄰嗟歎爲可欽而姓氏不傳於城邑幽光湮鬱潛德消沉者何可勝數爾部卽行傳諭督撫學政諸臣嗣後務令各屬加意搜羅虛公核詢確具本人鄉評實蹟題奏旌獎勿以匹夫匹婦而輕爲沮抑勿以富家巨族而濫爲表揚以副朕成俗化民實心彰善至意

十四日都察院奏請道員內陞外轉奉

上諭陞轉拘定年限未爲允協如外任好官因一盜案註誤不得陞遷豈不可惜嗣後科道官員內陞外轉不必拘定歷俸年限俱行開列

十六日

諭六部尚書侍郎等各部屬員既各分司則各有職守彼此不得干預况每司滿漢共有六員不可謂辦事無人若皆關冗貪庸何難指名題叅另易其人安可他司越俎代庖孔子曰不在其位不謀其政豈罔聞乎明係鑽營包攬爲漁獵之計嗣後不論何司不論滿漢永遠不得借才能之名一人兼攝數司之事若



有緊要事件暫時派出指辦一二事尚可

又

諭戶部治天下要道莫過安民朕纘承大統以來軫念蒼生痍瘵時切直隸山東河南連年歉收朕特降諭旨緩徵遣官賑濟每歲京師五城設立粥廠自十月初一日起至三月二十日止交五城御史煮粥賑饑今尚在青黃不接之時著展期一月煮粥散賑至四月二十日止但就食之民來京者多每日各增加銀米一倍務使得霑實惠以副朕憫念窮民至意

又

諭禮部國家掄才大典首重試官主考憑房考閱薦之文定其去取則一榜衡鑒之當否係於分校諸臣之賢不肖亦匪輕矣近科以來

皇考慎重闢門籲俊之典於順天鄉試及會試房考官慮其人邪正不一特命每房各用二人同閱試卷使之互相覺察彼此鈐制用意良爲周密但法久弊生一房兩考官豈皆遇秉公持正之人設有一狡黠者叅雜其間卽爲賢者之累况兩人或皆不肖則朋比作奸其害更甚嗣後仍著照舊定科場條例各房止用一人校閱其責旣專其功罪亦難推諉朕纘承大統思欲善繼

皇考旁求俊乂之志務俾鎖闢清肅盡得真才故特酌復



舊章防杜弊竇爾部卽遵諭行

又

諭都察院從來各衙門募設書辦不過令其繕寫文書收貯檔案但書辦五年方滿爲日旣久熟於作弊甚至已經考滿復改換姓名竄入別部潛踪掩跡無所不爲更有一等積棍名曰缺主獨掌一司之事盤踞其中事無大小一手握定而不肖司官交通賄賂倚爲腹心上下朋奸莫可查究書辦尚有更換缺主總無改移子孫相承竟成世業各衙門奸弊叢生未不由於缺主者自今以後書辦五年考滿各部院堂司官查明勒令回籍候選逗遛不歸者著都察院飭

五城坊官稽查遣逐至於缺主多捐納官職原有勢力可以抗違爾衙門職掌糾叅立刻查明缺主的名題叅革究押解回籍庶作弊之本原永絕而官方可以肅清矣著各部院衙門會同確議具奏 又奉上諭嗣後缺主與年滿書辦發回原籍之處著各部院一年一次保結具奏倘仍有潛居京師者或經朕聞知或被科道題叅將保結具奏之大臣官員一併治罪

又

諭六科給事中監察御史

皇考臨御六十餘年至聖至明無日不以國計民生爲念



凡所以咨訪吏治通達民情之意至為殷切乃邇年以來無知小人見科道上疏者少遂疑

皇考不甚信納科道之言又譏言官皆緘默自容此大失皇考本懷真所謂坐井觀天也殊不知內而滿漢大臣外而督撫提鎮皆許密摺言事蓋因各省地方事務督撫身親閱歷自能詳悉周知較言臣風聞無稽之談弗詢之謀勝什倍矣以此

皇考據所聞見折衷行之大小國政措置咸宜言官無所用其建言補闕是以

皇考不務求諫之虛名而實於天下之利弊無不洞觀也朕仰承大統一切遵守成憲首以求言為急在京滿

漢大臣外省督撫提鎮仍令摺奏外爾等科道諸臣原為朝廷耳目之官與朕躬最親與國家最切凡有所見自應竭誠入告皆當絕去避嫌顧忌之私乃為忠盡也爾等今雖備位臺垣即將來之公卿大吏為科道時若不能盡言則後日官至大僚豈能期爾建白謀猷乎今著爾等各科道每日一人上一密摺輪流具奏或二三人同日各奏一摺一摺祇言一事無論大小時務皆許據實陳之即或無事可言摺內亦必聲明無可言之故在外候旨或召進面見或令且退其所言果是朕即施行即或未甚切當朕亦留中不發決不令一人知之倘有徇私挾仇顯係情弊巧



爲瀆奏者亦不能惑朕之耳目也密摺不許與人叅酌如有漏洩或同僚中知而言之則同僚即可據以密聞朕將兩人之摺合驗情事爾等能隱諱推諉乎至於有能面折廷諍或彈劾權要或更革弊端不妨仍照舊露章奏聞朕亦不拒又朕居藩邸時在朝大小官員及

皇考御前之人以至藝術之流從無熟識往來者卽藩邸

豈無素所任使之入然從不假以顏色信用其言今朕躬攬大權苟欲加之富貴何所不可而肯偏聽其言引爲私人乎但朕登極以來所用一二大臣皆深悉其人可用而用之非有念舊徇徇之心誠恐向日効力微員借稱王府舊臣在外招搖嚇騙生事干法其害甚大斷難姑容爾等可不時留心察訪一有聞見著卽刻密叅切勿畏忌爾諸臣其敬承明諭各抒忠悃毋負朕懸鞞設罍之意

又

諭直省督撫爾等抵任每使家丁管理事務號爲堂官往往串通中軍旗牌威嚇勒索且使潛往各屬探聽事件各屬皆有坐省家人與督撫司閤一氣相通爾謂甚密而彼已知之因得預爲賄囑若誤信其言則是非顛倒爲害滋甚至走差齋本之人每至驛遞抑勒多端騷擾百出尤屬不法嗣後著永行禁止不許



出入衙門堂上辦事則遣佐貳官輪班值日奔走出  
差則於衙役中擇家道殷實謹厚熟練之人分任仍  
嚴加察訪若招搖生事卽行革退

十九日禮部以恭上

合天弘運文武睿哲恭儉寬裕孝敬誠信功德大成仁皇  
帝尊諡儀注具奏奉

上諭爾部所奏閱

冊

寶儀注內並未議及朕躬行禮之處凡閱

壇廟祝帛悉皆行禮今閱

聖祖仁皇帝冊寶亦當行禮爲是爾等酌議具奏禮部恭

議得

皇上聖諭甚是凡閱

壇廟祝帛並皆行禮今閱

冊

寶亦應照閱祝帛儀行一跪三叩頭禮奉

旨是

二十日奉

上諭孫思克之妻係公主長輩且功臣之妻朕意欲令  
公主穿孝此事交與該部議奏將內庫銀賞給二千  
兩派大臣一員侍衛十員將茶酒往奠東四旗除有  
承辦事件之大臣外俱著前往發引之日仍著往送



二十一日戶部摺奏江蘇巡撫吳存禮奏請寬免  
康熙三十三年以前舊欠蘆課銀兩奉

上諭此項虧空錢糧屢經部駁而該撫仍請豁免此案  
歷年甚久如果當免卽應照所請議行倘不當免則  
應將該撫一併議處若徒往返駁詰是此事終無結  
案之期矣著將歷年所奏原案逐一查明議奏

二十三日諸王大臣等奏

皇上追念

先皇悲思篤切躬襄  
大事勞瘁倍常伏懇

皇上仰惟

先皇付託之重強抑哀情其詣

壽皇殿拜奠之處乞多隔數日奉

上諭朕哀慕之情誠因

皇考付託鴻基之重故愛惜此身於臣子之道十分未盡  
二三朕非強飾以取孝名但朕受

聖祖皇考四十五載顧復教育深恩此舉國所共知者今

一旦永訣中心悲痛何能自己目今尚得瞻仰

梓宮罔極哀思乘此猶可稍展至

梓宮睽隔之後何由再得瞻仰

皇考乎朕躬尚能自持朕亦儘力強制諸王大臣所奏知  
道了



二十五日奉

上諭向來奏銷錢糧不給部費則屢次駁回勒索地方官朕欲革除此弊特設會考府衙門前降諭旨甚明近見各處奏銷之事並不送會考府各部有擅行駁回者如此則勒索之弊尚未革除也嗣後有應駁之事定須送會考府查看如果應駁會考府王大臣官員列名駁回

二十六日奉

上諭從前土默特因遷移臺站殊為擾累乃伊等於用兵之際知為國家大事看守臺站毫無遲悞甚屬可憫除賞給米糧之外作何按人數加恩賞賜及前往

賞賜巡察臺站或另委人前去或即交與管理臺站人員之處總理事務王大臣等議奏

二十八日

諭理藩院衙門額駙敦多卜多爾濟策凌貝勒丹晉多爾濟公傅貝等俱自軍興以來効力有功之人深為皇考所軫念傅貝前於

皇考時奉使往和託輝地方甚有勞績其人材亦可用著優封郡王四額駙敦多卜多爾濟効力行開大兵往西藏時著有勲績著封親王貝勒丹晉多爾濟自軍興以來辦理伊等喀爾喀各項軍務著有勲績著封郡王此數人者皆於國家鞠躬盡瘁宣力効忠之人



朕特先加恩賞其軍前効力勤勞之衆喀爾喀人等  
自台吉以至兵丁俱著內扎薩克查明具奏朕將加  
以重恩

二十九日

諭吏部虧空錢糧各官若革職留任催追必致貽累百  
姓伊等既已獲罪革職豈可復留原任嗣後虧空錢  
糧各官卽行革職著落伊身勒限追還若果清完居  
官好者該督撫等奏明著通行直隸各省督撫知之

雍正元年三月

上諭二十一道

初一日奉

上諭頒發詔書禮部筆帖式人少不足以供各處頒詔  
之用且必得少知自愛材尚可用者方可差往其酗  
酒妄行無所顧忌之人豈可派去著將各部院筆帖  
式令各該堂官與總理事務王大臣會同揀選派往  
又

諭兵部福建福州府駐防漢軍兵丁向因伊等不思効  
力不安本分生事健訟

皇考欲令伊等改過將馬兵一半改爲步兵裁減馬匹俟



伊等知過能改再與施恩朕今詢問石文焯知彼處兵丁人口蕃衆度日艱難深爲憫惻著將福州府馬兵及馬匹數目俱復其舊額以仰副

皇考矜恤兵丁之

聖心一切應給之項俱照原數支給該部卽行文將軍總督巡撫通行飭諭兵丁嗣後俱應各安本分熟習騎射遵奉法度約束務思効力邊疆仰體朕養之至意如仍不悛改再蹈從前惡習國法具在斷不寬恕

初二日

諭副都統阿思海朕聞蒙古地方牧羊一事兵丁甚爲苦累又有歷年賠償一項爾到彼將作何料理之處

會同將軍議奏

初四日奉

上諭佟圖賚佟國綱佟國維著照公邁必隆之例建立祠堂每年二季致祭夫人並附祭再公圖海亦建立祠堂每年二次致祭

初六日

諭部院各衙門凡一應衙門卷案各有典守之官稽查引據全以舊檔爲憑此固一代之典冊六官之掌故不得視爲具文也收貯卷案封禁雖嚴而翻閱查對不能脫書吏之手盜取文移改易字跡百弊叢生莫可究詰皆由司官漫不經心或且通同作弊遂至於



此嗣後司官遷轉將所掌卷案新舊交盤各具甘結說堂存案如有疎失換易等弊一經發覺與受同罪爾各部院衙門急宜查核清楚設法封貯永杜弊端不得因卷案浩繁畏難退沮其交盤事例爾部院諸臣公同確議具奏

初九日江蘇巡撫吳存禮奏同知鄭山虧空錢糧請革職留任勒限賠還奉

上諭江蘇巡撫吳存禮將署理上海縣同知鄭山題請革職留任催追虧空錢糧鄭山既係賢能遴選署印之員何至虧空錢糧此項虧空應將遴委鄭山署事之上司查明令其分賠嗣後凡委署印應遴選賢員

署理如署印官虧空錢糧著落遴委署印之督撫布政使分賠如有將虧空錢糧勒逼接任官收受情由著接任官開列情由竟報部科該部科卽行據實奏聞

初十日

諭都察院巡視五城御史甚爲緊要一城滿洲漢軍漢人三員殊爲太多難得如許好官有一不肖卽掣肘廢弛一城之事嗣後一城只派二人漢軍著歸併於漢人班內筆帖式亦著隨御史更換如有生事不守分者卽行題叅若該御史徇情罷軟或被爾等查出或朕另有所聞將御史從重治罪爾都察院堂官不



時訪察該御史內有聲名不好者不必等待一年量其輕重或題叅革職降級或掣回本衙門其聲名好者卽行保留巡城二三年

十一日奉

上諭閱看通本每日交刑部事件甚多刑部具題事件甚少人命事件關係重大斷不可稽遲日期其何處如此稽遲之處著大學士嚴查并令三法司各將遲悞情由自行具奏

又奉

上諭侍郎王懿在軍前効力已久亦有年紀著王企培前去更換協辦軍需錢糧現今大將軍處事少渣克

且張連登王之樞著俱交與年羹堯在布隆吉爾地方開墾地畝築城効力伊等俱負

皇考任用之恩貪婪至極舉國皆知朕仰體

皇考保全故舊大臣之

聖心不忍將伊等置之於法著仍帶原品効力如能改過朕仍從寬起用倘不自知罪戾不感激朕寬容包含予以自新之路將所交差使推諉於人隱匿贓私心懷怨誹朕滿二十七個月之後必行明正其罪置之重辟王之樞渣克且所遺員缺著開列具奏伊等四人之親子十五歲以上者俱著跟隨伊父前往効力現今在內在外有居官者俱行離任暫帶原品發往



其員缺俱著另補如不悞所交之事盡心効力著年羹堯保舉議敘王之樞王企靖等俱於到京之時再降旨發往

十三日

諭總理事務王大臣吳爾占所犯之罪甚重卽應交與伊族處死但朕卽位伊始未曾誅戮一人吳爾占又係宗室朕不忍將伊卽正典刑著從寬免死從前伊父獲罪於

皇考貶其親王之爵伊等怨望肆行誹謗

皇考深知伊等承襲王爵者不知感恩不承襲者又生怨望是以未令承襲伊等希圖王爵互相傾害陷伊宗嗣於死地色亨圖又覬覦王爵各處鑽營卒不能得復生怨望去年在南海子舉止傲慢以致

皇考震怒伊等俱屬無知妄亂不安本分之人不可容留京師經錫之子並吳爾占父子色亨圖父子給假五日料理發往盛京到盛京時無論城內城外令其在五十里內居住伊等屬下佐領交與該旗請旨朕另有處置包衣佐領內令其酌量力能養贍人數帶往其餘交該旗請旨至於一切器用交與伊隨往之家

人限兩個月務令收拾清楚起身前去不可潛留一人倘仍來往京師暗通音信彼時朕不得已定按律治罪



十四日

諭總理事務王大臣朕降旨速議事件每至遲延應定  
限速結議政九卿會議事件亦有待一二人不至以  
致耽延者嗣後議政九卿會議事件縱使一二人有  
事不至現在之人卽列銜定議其未到者不必列銜  
經朕查問本人各自陳奏

又福建巡撫黃國材奏琉球國進貢頭號船內貢  
使表文及方物一半沉海所到二號船內彝目准  
其返國補具表文方物再來進貢禮部議准具奏  
奉

上諭琉球國進貢使臣毛弘健等所坐頭號船內人員  
俱衝礁覆沒甚屬可憫所失表文方物免其補進准  
作送到京師二號船內所存方物交與來使帶回仍  
准作進貢到京其賞給之處著察例具奏俟降諭旨  
所賞之物行文該地方官賞給令其起程

十五日

諭內閣禮部

至聖先師孔子道冠古今德參天地樹百王之模範立  
萬世之宗師其爲功於天下者至矣而水源木本積  
厚流光有開必先克昌厥後則  
聖人之祖考宜膺崇厚之褒封所以追邇前徽不忘所  
自也粵稽舊制



孔子之父叔梁公於宋真宗時追封啟聖公自宋以後歷代遵循而叔梁公以上則向來未加封號亦未奉祀祠庭朕仰體

皇考崇儒重道之盛心敬修崇德報功之典禮意欲追封五代並享烝嘗用伸景仰之誠庶慰羹墻之慕內閣禮部可會同確議具奏

又刑部等衙門議覆山東省地方盜劫高汝爵龐夫起楊化麟三案盜首獲日另結現獲為從各犯照例免死減等發遣奉

上諭覽該部議覆山東省盜案三本皆以未經拏獲之邵廷貴楊禿子高明顯作為首犯明係地方官吏不肯追捕全夥研審確情何避重就輕草率結案現獲各犯若概置重典則原非首惡若悉從末減又何以懲兇暴而安善良寬嚴之義未得其中滋盜長姦莫此為甚此三案首犯交與該巡撫著落印捕各官設立賞格勒限嚴緝務令就擒毋使漏網逾限不獲從重議處庶幾法無枉縱盜風可望少息矣  
十六日禮部等衙門奏欽天監官恭詣

陵寢相度地界議覆奉

上諭

陵寢重地凡有關於風水者理合嚴禁但將相隔甚遠本無關礙之地俱以有關風水論則無知小民以私竊



耕種樵採而獲罪者必多矣前因

陵寢地方柴薪甚艱曾令欽天監會同總管副將詳確相  
度將遙遠無礙之地令眾樵採此等田土或交皇莊  
耕種或應作賞給之用著總理事務王大臣會同戶  
部禮部工部欽天監定議

十七日刑部議奏臺灣叛賊家口分別定罪奉

上諭凡謀反大逆以及謀叛重罪均無可宥按律凌遲  
處死正犯之祖父父子孫兄弟及同居之人期親及  
伯叔父兄弟之子不限已未析居男十六以上不論  
篤疾廢疾皆斬但此案事起倉卒遠隔海洋親屬人  
等有身在臺灣者亦有身在內地者若槩從誅戮情

堪憫惻除身在臺灣者依律正法外其在內地者從  
寬免死解部給與功臣之家為奴該督撫逐一詳查  
應行正法者正法應行解部者解部

十九日

諭理藩院傳旨與追勦厄魯特羅卜藏錫拉布等之王  
貝勒貝子公台吉大臣侍衛暨兵丁等爾等一聞厄  
魯特潛遁俱各親率兵丁奮力追勦誅斬擒獲無一  
漏網甚屬可嘉爾等皆因感戴

聖祖皇考仁恩所以為朕抒誠効力如此况賊人無多爾  
等尚且親率兵丁追勦如遇大敵其必努力前驅更  
不待言矣爾等忠誠朕已深悉甚為欣悅凡効力之



人著查明具奏朕將特加恩賚將此諭旨繕寫交與  
來京之護軍郭莫多領催白爾和圖七十四等齋回  
通行傳諭再主事多爾濟等現在彼處卽令伊等將  
追緝賊人効力身亡得傷人等逐一查明具奏  
二十日工部奏廣善庫已經奉裁所有承修七處

壇廟工程應交工部修理奉

上諭各

壇廟工程廣善庫修過者甚多其竝未年久而卽至於重  
修者乃係伊等尅扣錢糧以致所修俱不堅固爾等  
嚴加確查此工程著派監察御史給事中共七員部  
院衙門賢能司官七員工部司官七員每處各派三

員敬謹堅固修理七處派大人七員監修

二十一日禮部奏

景陵安奉禮成後親王大臣等恭奉

升祔

太廟神主回京奉

上諭明季帝王皆不親送梓宮至陵故令親王大臣奉  
主回京朕旣親往若不躬奉

神主而歸於心何安俟

山陵事畢點

主禮成朕親奉

皇考神主回京途間如何分站及如何先還預備奉迎之



處一併詳議具奏

二十二日

諭戶部陝省自軍興以來大兵駐劄運送糧餉供支草  
豆無一不需民力原非他省可比

皇考每為軫念今當大沛恩膏以予惠元元所有康熙六  
十年以前陝西全省除借給籽種著該督撫查明定  
議分年帶徵外其餘凡有民屯衛所實在未完銀米  
豆草悉予蠲免倘有不肖官吏以虧空捏稱民欠濫  
邀曠典者一經發覺罪在不赦該部作速行文毋得  
遲留

二十五日江蘇巡撫吳存禮奏請寬免蘆課等項

銀兩奉

上諭江蘇等屬民欠地丁等項銀一百三十一萬餘兩  
內蘆課等項銀九萬八百兩零雖非恩詔內應行豁  
免之項但此事歷年最久倘行催徵窮民必致受累  
著一併豁免



雍正元年四月

上諭二十道

初六日

諭理藩院爾衙門人員來往蒙古地方者聞有不肖之徒肆行無禮勒索凌虐夫外藩之與天朝不但伊扎薩克王即台吉亦係賓客豈可令領催等卑賤之人肆其欺凌乎著爾衙門嚴行申禁詳定條例俾嗣後來往之人永遠遵行

初九日總理事務王大臣等奏

聖祖仁皇帝梓宮奉安

山陵大禮已成距

雍正元年四月



升遐之日已閱五月恭請

皇上御門聽政以慰羣情奉

上諭諸王大臣所奏雖是我

皇考梓宮尙在

享殿安奉朕今卽臨御正門理事心實不忍念

皇考付託重大節養朕身至一切禮儀多有未盡每以天

下萬民事關緊要勉強照常辦理亦無遲悞臨御正

門理事俟

皇考梓宮奉安

地宮之後再爲舉行

十一日諸王大臣援據典禮再三懇請

皇上御門聽政奉

上諭諸王大臣等援古帝王典禮再三懇請朕亦無可  
如何知道了

十三日奉

上諭黑龍江船廠等處人口孳生各處之人聚彼貿易  
甚多今地方有應料理之事只將軍武官料理致有  
於例不合之處此兩處或御史或部院賢能官員酌  
量派出一二員到彼料理其差滿更換年限著議奏

十四日

諭總理事務王大臣朕臨御以來時以天下蒼生爲念  
凡自外省來京之員各處雨暘豐歉必面見詳問蓋



欲周知民隱也差往致祭華嶽之侍讀學士田文鏡  
今日回京朕詢彼經過地方情形與百姓生理據奏  
山西平定州壽陽縣徐溝縣祁縣等處雨澤歉少民  
間生計維艱汾州府屬地方得雨亦未霑足地方官  
現在徵比錢糧夫巡撫以撫綏地方愛養百姓為職  
今平定壽陽等處黎民饑饉並未奏請賑濟緩徵反  
行催科小民何以存濟此皆因伊等去年曾奏報得  
雨今欲掩飾前言甚屬不合巡撫德音布政使森圖  
著交該部察議仍卽命侍讀學士田文鏡會同巡撫  
德音率領地方官員將平定等四州縣饑民速行賑  
濟務使恩澤實霑撫養得所毋羈時日以致羣黎失  
業爾等卽傳諭遵行

又吏部帶領月官引

見奉

上諭引見月官衣服頗甚整齊聞貧窘之員有賃覓衣  
服者朕之觀人並不在於服飾也嗣後引見官員各  
量已力尋常潔淨衣服亦可引見勿圖鮮華強為備  
辦至於侍衛等只務被服華美亦當量力服用并著  
曉諭傳示

十五日

諭直隸各省督撫國家敦勵風俗首重賢良舉髦士以  
勸秀民實為政教之大端凡封疆大吏宜共體此意



廣詢博訪不可視為具文漫不加察也前所頒恩詔內有每府州縣衛各舉孝廉方正暫賜以六品頂帶榮身以備召用一條距今數月未有疏聞豈通都大邑之中海澨山陬之遠遂無潛修砥操克稱俊又可應詔者歟誠恐有司怠於採訪雖有端方之品無由上達殊負朕殷殷延攬之至意特著直省各督撫速遵前詔確訪所屬果有行誼篤實素為鄉黨所推者卽列名具奏毋得隱蔽及濫引塞責

又直隸巡撫李維鈞奏原任署撫趙之垣應發回原籍令川陝督臣清查伊叔趙弘燮家產以完帑項奉

上諭曰

皇考御極六十餘年用人之道嘉善獎能不吝爵賞宥罪赦過率多矜全如勇畧將軍趙良棟乃心王室忠勇素著始終宣力有如一日

皇考待以隆恩異數超越等倫其子趙弘燮承其先世之餘蔭位任封疆不思竭力報稱惟圖利偷安以致事務廢弛庫帑虧空

皇考不忍遽加罷斥寵遇如初格外優容冀其改悔迨至病故又令其姪趙之垣往署撫篆為之料理一切未完事件蓋不欲其生平行事一朝破露遂罹國法傷其先人名節耳



皇考之所以待功臣者至於如此亦云厚矣朕繼承大統  
卽洞悉趙之垣暗昧無知萬難勝任然猶仰體

皇考深仁厚澤曲加優庇面飭訓諭數次乃趙之垣怙終  
不悛昧於大義具摺捐銀三十萬兩始知前此所聞  
勤要屬官銀兩進上之言並非虛語不知是誠何心  
試問此銀出於何所直隸全省數十萬民生係於巡  
撫一人之賢否奉職無狀貢納財物謂可邀免有是  
理乎昏謬至此無怪其不知君恩之高厚矣畿輔重  
地貽誤匪輕特令解任准其暫回原籍仍著遠來完  
補伊叔任內虧空俟其完日朕尚能全其身命保其  
門戶猶是

皇考厚待功臣之意也趙氏父子忍負國恩

皇考與朕寧忍負功臣後裔耶該部速將此諭行文川陝  
總督抄謄告示曉諭使咸知朕意

十六日

諭總理事務王大臣前諭各衙門司官遷轉將所掌案  
卷新舊交盤說堂存案向日部中案卷面書堂司官  
姓名下註題押其接縫處或標封字或用司印尚可  
私竊增刪嗣後皆用堂印有添寫處亦用堂印並設  
立印簿開明年月用印數目及用印司官名姓如此  
則弊端可杜而卷案亦按簿可查傳諭各衙門一體  
遵行



又

諭翰林院自古帝王臨朝施政右史記言左史記動蓋欲使一舉動一出言之微無不可著為法則垂範百世也

皇考聖祖仁皇帝英年踐阼卽設日講起居注官於詞臣中擇其才品優長者以原官充補鉅典茂昭度越前代誠為聖帝哲王之盛事御極六十一年紹精一執中之統勵敬

天勤民之心文謨武烈經緯萬幾盛德日新大業鴻顯天下臣民仰瞻至治不啻日月麗天江河行地莫不敬信悅服記注之臣美不勝書

皇考聖祖仁皇帝謙德彌光聖不自聖唯恐史官或多溢美之詞故康熙五十六年以後裁省記注祇令翰林五員於理事時輪侍班行凡有重務要旨仍命內閣諸臣記而存之意至周深也茲朕纘承大統夙夜兢業日昃不遑思所以上繼

皇考功德之隆下致四海安之治顧惟涼德深懼負荷之難今御門聽政之初益當寅畏小心綜理庶事咸期舉措允宜簪筆侍臣何可闕歟當酌復舊章於朕視朝臨御祭祀

禮之時令滿漢講官各二人侍班不獨記載諭旨政務或



朕有一言之過一事之失皆必據實書諸簡策朕用以自警莫寡悔尤庶幾凜淵冰之懷以致久安慎樞機之動以圖長治其仍復日講起居注官如康熙五十六年以前故事爾衙門即遵旨行

又

諭理藩院緯木聘等逃遁本屬小事蒙古人等凡遇之者俱各不顧身命努力追擒伊等感激

皇考覆育深恩竭誠仰報朕覽奏章爲之墮淚嘉歎不已將此旨繕寫發與達鼐令將効力人等查明具奏毋使一人遺漏朕將加以特恩

十八日

諭滿漢部院八旗各衙門明黨最爲惡習明季各立門戶互相陷害此風至今未息兩相結黨必有一傷惟我

皇考允執厥中至仁在宥各與保全不會戮及一人爾諸大臣內不無立黨營私者卽宗室中亦或有之爾等若以向蒙

皇考寬大幸免罪愆仍蹈前轍誘惑朕之無知弟姪必致殺身覆族昏昧極矣豈但滿洲卽漢人亦與一家骨肉無異何苦波累及之至於誅戮豈不可愍夫人之性情各有所向豈有與通國之人無不投契之理但辦理公事不可存私今諸大臣俱在朕前朕居藩邸



若曾與爾等議及私事賄買人心密相往來今日爾等之前豈能降此諭旨乎

皇考知朕中立不倚斷無殺戮之事是以命朕繼承大統朕自思之亦惟朕方能不戮一人無一不保全耳朕非獨因

皇考付託之重實感

皇考四十餘年教養深恩委曲周至言念

弘慈吳大罔極此朋黨之習爾諸大臣有則痛改前非無則永以為戒爾等當思

皇考數十年寬厚之恩亦當共體朕委曲保全至意若仍怙惡不悛朕雖欲勉强仰體

皇考聖衷力為寬宥但迫朕於不得已之時將憑

皇考之威靈執法誅戮誰曰不可乎夫朕言是即宜遵行朕言非即宜陳奏朕未嘗拒也朕屢詔求言雖小臣欲進言者咸得上達每多召入屏去左右令其面陳爾諸大臣非不得奏之人乃隱匿不奏退有後言某人不當用某事不當行誠小人之惡習也夫朕所用之人所行之事如有不當爾等身為大臣何難陳奏所言果是朕即用之矣孟子云吾君不能謂之賊如不奏而但肆譏議設有人詰以不奏之故能無愧於心耶賢者朕之所好爾等即宜好之不肖者朕之所惡爾等即宜惡之乃或其人為朕所信任盡心竭力



於國家之事則反謂其專擅作威如此人孰肯效其所爲自取誹謗乎其或唯諾成風諸事不問但思自便其身爲已則得矣於國何補夫君親大義也而君於親尤重譬若父之讐則與之相愛父所愛則與之爲讐爲人子者有是理乎要之以君之好惡爲好惡然後人人知改其惡而遷於善君臣一心國之福也傳之萬世亦有令名爾等其祇承朕諭永遠遵行

又

諭大學士等爾等皆

皇考簡任耆舊大臣論年齒雖與

皇考相等若經歷事務豈能仰及

皇考萬一

皇考實足爲爾等之師是以爾等但能奉遵

諭旨者斯稱善已朕自幼未曾理事

皇考命朕紹承大統朕深念付託之重凡朕所降諭旨爾等以爲是則曰是以爲非則卽陳奏勿得而從雖封還硃批諭旨朕亦深喜斷不譴責朕如此信任爾等若但隨聲附和是自取辱也

又

諭吏部戶部兵部各省給發駐防官兵米穀草豆等項價值不一除已有定額省分照常給發外其餘未曾定額省分多寡不符理應將本省歷年給發之價酌



處其中畫一定議價值一定便於遵行如遇年豐價平稍有贏餘於官兵亦屬有益倘歲歉價貴該督撫據實陳奏朕自加恩

又

諭領侍衛內大臣八旗都統統領等國家武備關係重大爾等皆有訓兵責任昔

皇考常躬率士卒寓訓練於較獵之中

皇考騎射超倫士卒無不欽服各相鼓勵並非爾等訓練所致朕不能企及

皇考則訓練之事惟爾等是賴但訓練士卒有實心操習者亦有虛應故事若若爾等按期較射以圖塞責不

過閑談飲茶而散則不但徒勞軍士爾等亦徒多往返何益之有此皆朕居藩邸時素所深知者今欲密訪何難卽聞前吳爾占任領侍衛內大臣三年詢以侍衛馬射奏云不曾寓目

皇考宥之若朕則不能寬恕矣爾等能盡職朕必全爾等顏面爾等亦宜全朕繼述之孝思嗣後爾等務宜實心訓練比來軍士生計稍艱

皇考教養六十餘年

恩賚頻施無不周備以天下之正供贍養兵丁如此外再欲加增錢糧亦恐難給兵丁生計之艱其故雖多大抵因奢侈所致爾等皆管轄兵丁之人應將平素守



分者加以優獎奢侈者加以訓斥則自知懲勸矣此事一時亦難移易朕與爾等約以三年爲期如三年後仍不能改爾等之罪不止罷黜且一經罷黜勿希復用彼時勿更怨望

又禮部議奏

孔子先世五代應俱封公爵奉

上諭五倫爲百行之本天地君親師人所宜重而天地君親之義又賴師教以明自古師道無過於孔子誠首出之聖也我

皇考崇儒重道超軼千古凡尊崇

孔子典禮無不備至朕蒙

皇考教育自幼讀書心切景仰欲再加尊崇更無可增之處故勅部追封

孔子先世五代今部議封公上考歷代帝王皆有尊崇之典唐明皇封

孔子爲文宣王宋真宗加封至聖文宣王封

孔子父叔梁紇爲齊國公元加封

孔子爲大成至聖文宣王加封齊國公爲啓聖王至明嘉靖時猶以王係臣爵改稱爲

至聖先師孔子改啓聖王爲啓聖公王公雖同屬尊稱朕意以爲王爵較尊

孔子五世應否封王之處著詢問諸大臣具奏



又直隸巡撫李維鈞奏修築太行等堤銀兩請公同捐助奉

上諭修築甄家莊等四處漫決堤工用過銀兩俱因緊要工程動用不必捐補著以正項錢糧奏銷

二十四日吏部議奏山西巡撫德音布政使森圖隱匿地方災荒既不奏報又不停徵照溺職例革職奉

上諭遣祭華嶽之侍讀學士田文鏡到日朕詢彼經過地方情形與百姓生理據奏山西平定州等處民間生計維艱地方官現在徵比錢糧卽遣田文鏡速往賑濟况年羹堯來京之時曾囑德音查明歉收州縣

奏請緩徵至今並未奏聞巡撫係封疆大吏一聞百姓饑饉當卽陳奏德音既不奏聞反行催科徵納其不能勝巡撫之任於此可見德音從寬免革職著來京在學士任効力行走其員缺著諾岷補授布政使森圖人不及著革退在驍騎叅領効力行走其員缺著連肖先補授

二十六日

諭戶部朕臨御以來宵旰憂勤凡有益於民生者無不廣爲籌度因念國家承平日久生齒殷繁地土所出僅可贍給偶遇荒歉民食維艱將來戶口日滋何以爲業惟開墾一事於百姓最有裨益但向來開墾之



弊自州縣以至督撫俱需索陋規致墾荒之費浮於買價百姓畏縮不前往膏腴荒棄豈不可惜嗣後各省凡有可墾之處聽民相度地宜自墾自報地方官不得勒索胥吏亦不得阻撓至陞科之例水田仍以六年起科旱田以十年起科着著爲定例其府州縣官能勸諭百姓開墾地畝多者准令議敘督撫大吏能督率各屬開墾地畝多者亦准議敘務使野無曠土家給人足以副朕富民阜俗之意該部卽遵諭行

又戶部議奏公庫銀兩照常借與官兵奉

上諭此項支借銀兩原欲使官兵有所裨益其果否支借及該管官員有無指名侵用情弊現在庫內存數若干遣副都御史牛鈕給事中鄂托拜速往查核再出征官兵支借庫銀亦有已經豁免者一併查明議奏



雍正元年五月

上諭三十三道

初一日大學士等奏

孝陵新產蒼草請宣付史館以昭

世祖

聖祖功德之隆

皇上孝治之感奉

上諭

孝陵新產蒼草皆由

世祖

聖祖功德隆盛所致非朕孝思所能感格覽諸臣陳奏引

雍正元年五月



據剴切著照所請行

又禮部等衙門奏

皇上孝思罔極

登極以來尚未

臨御正殿五月初五日時協正陽恭詩

皇上御太和殿行常朝禮奉

上諭朕原欲週年之後始陞御正殿今諸臣援引古典  
合詞懇奏朕限於禮制勉從所請其奏樂賜茶著停  
止

初二日雲貴總督高其倬題免鶴永等處取藏兵  
丁賠補倒斃馬匹兵部議奏仍著落賠補奉

上諭兵丁遠馳異域甚屬勞苦且滿洲綠旗俱當一視

此倒斃馬匹若仍令伊等賠補朕心不忍著盡行豁  
免

初六日奉

上諭大小官員有一定之品級卽有一定之服式所以  
重名器也近多不按品級輒帶數珠馬項懸纓前用  
導馬更有將紬爲坐具者尤爲僭越嗣後應各按品  
級遵奉定例而行著八旗大臣步軍統領衙門都察  
院衙門嚴行稽查如有此等之人卽行指叅若大臣  
官員等徇情疎忽經朕查出將伊等一併議處再舊  
例諸王等以數珠鞍轡賞伊屬下者許其服用此等



人員難於稽查嗣後著將賞用之處行文該旗存案  
年底彙奏如此則等威有辨而僭越者少矣

又奉

上諭湖北布政使員缺朕熟思數日不得其人著大學  
士尚書都御史侍郎副都御史等各保一人密摺封  
奏如又有所知堪任他職者亦併繕入再有裨益政  
事啓沃朕躬之言併附陳奏務宜謹密所奏必出於  
公正倘有交通約會等情使朕聞知不獨見輕於朕  
且彼此非笑亦當顧惜尚其慎之

又

諭禮部近日天時頗旱

皇考先年屢降

諭旨云大喪之後必有旱年

太皇太后

世祖章皇帝

皇太后皇后之事俱曾經過朕當此之際嘗恐懼於懷而  
未置也三月十二日雨雖霑足朕曾雨三次以儆惕  
之意曉諭衆人三月以來風多未雨遂覺旱乾再直  
隸山東山西河南地方連年雨水不調用禾歉收朕  
雖遣大臣官員賑救當此旱時民必皇皇朕心甚以  
爲慮朕在宮中雖早爲盡心虔誠祈禱尚未霑足朕  
躬仍虔誠祈禱爾部亦虔誠祈禱諸大臣各敬謹齋



戒

初七日奉

上諭鄭家莊修蓋房屋駐劄兵丁想

皇考聖意或欲令二阿哥前往居住但未明降

諭旨朕未敢揣度舉行今弘皙既已封王令伊率領子弟

於彼居住甚爲妥協其分家之處現今交與內務府大臣辦理其旗下兵丁擇日遷徙之處俟府佐領人數派定後舉行弘皙擇吉移居一切器用及屬下人等如何搬運如何安置並何日遷移兵丁如何當差府佐領人等如何養贍及如何設立長久產業之處著恒親王裕親王淳親王貝勒滿都護會同詳議具奏一切供用等項務須議令充裕勿使伊艱難並貽累屬下之人彼處離京城二十餘里不便照在城居住諸王一體行走除伊自行來京請安外其如何上班及會射諸事著一併議奏

又九卿覆議四川蓋造營房官員分別議敘具奏奉

上諭議敘四川蓋造營房一事前則不及今又太過議事以公平正直爲主何至參差如是若朕欲加恩何難特發諭旨所以令諸臣公議者原以求其至當朕本無成見也且朕受

皇考高厚之恩纘承大統爾諸臣宜矢公矢慎共襄盛治



嗣後務宜屏去私心勿事機巧凡事祇求當理卽合朕意逢迎之術斷不可用朕昔在藩邸洞悉諸弊豈有向以爲非至今日而忽以爲是耶諸臣如不痛加洗滌不獨見輕於朕且貽笑於天下後世矣

又兵部議奏甘肅巡撫綽奇題請同知遲煥等應賠駝隻銀兩勒限追賠又奏遊擊王兆萬等倒斃駝隻著落分賠奉

上諭此項駝隻買備已久原牧養官員亦有身故者且俱係微員著落伊等賠補勢必不能著俱從寬免

初十日

諭翰林院部院衙門俱設司官專管定稿說堂筆帖式

專管繙譯廳官專管收發文書翰林院衙門亦有錢糧出入陞遷議敘並各衙門文移往來事務煩瑣關係不輕乃俱出自筆帖式典簿廳之手故遲速輕重多有弊端如庚子鄉試添送假監入場今年又用假印出結其已發覺者如此掌院學士應於俸淺編檢內擇才守優長者滿漢各二員充作司官專主定稿說堂庶小吏不得作弊而衙門肅清矣所委充司官之編檢如果實心任事辦理公敏著掌院學士據實奏聞加以殊恩

十一日

諭大學士等此番鄉試落卷著大學士王頊齡尚書勵



廷儀署吏部侍郎內閣學士史貽直戶部侍郎張伯  
行李周望兵部侍郎阿克敦副都御史李紱同南書  
房翰林檢閱如人不足於翰林院編檢內揀選十員  
再此番係雍正元年特恩加科有因迴避考官不會  
應試者殊屬可憫卽令派出大臣擬題奏請候朕點  
出於內閣考試

又廣西巡撫孔毓珣摺奏請將捐助軍需銀兩解  
送西安奉

上諭凡地方官捐助軍需應先行奏聞否則或致分派  
屬員科欵民間亦未可定孔毓珣捐助銀兩旣經解  
送則已該部可行文孔毓珣知之

十二日

諭大學士等刑部直省命盜案件主稿雖在刑部然必  
由三法司等衙門公同確勘畫題方行請旨今刑部  
議覆被盜疎防及人命失察等案有該督撫未將所  
屬地方官弁報叅者刑部於具題完結本尾聲明行  
令查叅到日再議嗣經該督撫有照例補叅者亦有  
援例請免者止用咨覆刑部旣不再題又不照會都  
察院大理寺衙門是以部中姦猾胥役得以操縱其  
事暗地招搖有部費者則爲援引輕例且有竟將咨  
文沉匿日久潛消者如無部費雖督撫聲明在所可  
寬不准邀免欺隱朦混事同議異嗣後凡三法司會



議案件本尾有帶及行令補叅者督撫咨覆到部其或處分或寬免作何完結之後令刑部知會畫題衙門公同刷卷如此則胥役不得萌逞故智上下其手矣

十五日

諭大學士等清字譯漢字綸綍攸關職司宜慎若但拘泥字句則文義不能貫通但期通俗明易則修詞未能典雅必須詞意兼到方可宣達朕之意旨嗣後凡清字上諭及改簽旨意內閣滿漢諸臣當會同商酌詳細譯定將滿漢文俱繕寫進呈覽定施行

十七日

諭滿漢九卿詹事科道天時亢旱朕夙夜焦勞敬謹齋戒久未得雨意者用人行政之間尚有缺失不能感召天和以致甘霖未沛朕欲在廷諸臣直言得失猶恐視爲具文概以諛詞頌揚負朕實心求言之意今特諭爾諸臣各具密摺凡朕所行之事或有過失務須盡言無隱卽所行無過或更有應行事宜爾等各據已見陳奏務期盡善使朕有則改之無則加勉方得古大臣責難於君之義至用人一途或有未當爾等務必據實指陳勿避嫌怨卽朕親信重臣亦不妨指出上古君臣都俞吁咈至今傳爲盛事爾等若能披肝露膽極言直諫卽所奏未盡合宜朕亦重其人



品倘仍瞻徇依違浮詞塞責朕亦薄其爲人此諭出於至誠爾等各宜副朕實心不可虛應故事果有嘉謨嘉猷俾得見之政事將召天和而蘇民困胥在於此矣

又

諭吏部國家大典首重掄才必主司鑑空衡平內外簾官協心共事加意釐剔放榜後方得士心悅服京師首善之地關係尤重朕於雍正元年特行開科并廣額數欲振興文教俾單寒績學之士人人自奮今順天主考朱軾張廷玉公慎自矢細心搜閱盡拔佳文內外簾官亦能各自淬礪屏除弊端榜發之日輿論

翕然朕心甚爲嘉悅其酌加議敘用示優獎兼使嗣後考官咸知激勸以副朕興賢育才之意

又

諭兵部武職人員原因騎射而得功名當以弓馬之優劣爲授官之先後則人人自勵演習益加精勤矣如部發外省年滿千總向來挨次補用不論騎射之優劣所以杜奔競而絕營求也朕思優劣不分但按名次伊等以爲名次既定補授有期不復以弓馬爲事何以勵人才而資實用乎嗣後命往年滿千總應令督撫確加考驗騎射優者先行題補劣者令其學習不按名次以爲先後庶武弁皆知勉力騎射不至廢



弛至於督撫乃封疆大臣自無不秉公之理爾部確  
議具奏

二十日

諭大學士等山西平定州等處山多田少粒食恒艱小  
民向賴陶冶器具輸運直省易米以供朝夕近聞直  
隸州縣因米貴禁糶此方百姓何以仰給昔春秋時  
諸侯各君其國尚申遏糶之禁今天下一家海內之  
民皆吾赤子自宜緩急共濟現今陝西督臣運米萬  
石賑救山西甚愜朕意豈有坐視鄰封乏食反行遏  
糶之理自今凡鄰近郡邑偶遇荒歉卽相拯卹毋得  
各分疆界漠不相關其所當禁者富戶規利販米動

盈千萬又沿海數省運米出洋玩法網利該督撫提  
鎮當著實嚴查禁止至肩負小民貿易度日悉從自  
便可也著直隸巡撫曉諭鄰近平定州等處州縣不  
得禁糶以副朕一視同仁之意并諭直省各督撫通  
使知悉

又

諭戶部山東連年荒旱百姓艱食朕夙夜焦勞已諭巡  
撫多方賑濟近聞兗州等處雨未霑足誠恐小民之  
食無以爲生現今糧船未入閘河可乘此時截留漕  
米以備賑恤爾部酌議截留米石數目及分貯何府  
州縣作速具奏勅諭該撫遵行



又

諭河南巡撫石文焯河南居四方之中地廣民庶爲幅員要區素封之家常喜儲藏米穀以收居積之利比年連遇荒歉民食維艱貧者逃亡頗衆朕夙夜屢懷思所以安全拯濟之道前特遣官往賑務令實心奉行俾窮黎得安衽席河以南數郡雖已得雨河北三府時逾麥秋尚未霑足誠恐小民勢難耕種不可不預爲籌畫或暫開納粟准作貢監之例則富室所貯之粟皆得流通出納於官以爲賑恤之用似屬有益該撫可卽詳議具奏

又

諭河道總督齊蘇勒漕運總督張大有山東巡撫黃炳歷年漕船遲滯皆由運河淺阻運河之水全賴山東諸湖蓄水以資灌注近歲諸湖漸就淤積附近居民或佔成田地以致水少不能引以濟運今宜乘夏秋雨水之時預爲蓄水之計及今不圖明年重運必至仍舊艱阻爾諸臣應各留心相度凡沿途近地已經成田者不必追究其未經耕種者當湖水稍落速宜嚴禁不可仍令侵佔至諸湖隄防務須修築堅固引河閘座務須啟閉得宜則湖水深廣運河自然流通不竭將來漕艘更無阻滯之虞矣

又揀選保舉之內閣中書等官員蒙

雍正元年五月

十



賜貂皮緞疋謝

恩奉

上諭爾等黽勉供職顧惜顏面潔已勤慎勿以官職卑微遂自菲薄異日繼起大臣端於爾等是賴爾等務須以善爲師忠良是效其姦回邪曲不識君臣大義委靡怠惰之人斷不可學敬之念之

二十一日

諭大學士等孝經一書與五經並重蓋孝爲百行之首我

聖祖仁皇帝欽定孝經衍義以闡發至德要道誠化民成俗之本也鄉會試二場向以孝經爲論題後改用太

極圖說通書西銘正蒙夫宋儒之書雖足羽翼經傳

豈若聖言之廣大悉備今自雍正元年會試二場論題宜仍用孝經庶士子咸知誦習而民間亦敦本勵行卽移孝作忠之道胥由乎此又聞各省鄉試房考凡州縣官由科甲出身者止許入闈一次夫考官以秉公精鑒識拔文才爲主何論會否入闈嗣後凡遇鄉科各省督撫臨場調齊科甲出身之員不論已未分房監臨試以時藝一篇其文理優長者爲內簾房考荒疎者供外場執事則分校得人而佳文盡拔矣朕於雍正元年開科廣額總欲鼓勵人才興起教化著該部通行直省督撫俾副朕崇教育才之意



又內閣九卿等奏

皇上因天時少雨虔禱宮中自早至暮未曾進膳

天意感孚甘霖立霈恭請頤養

聖躬照常進膳奉

上諭

上天暨

皇考在

天之靈慈憫朕躬卽時昭應朕心焉有不感荷欣慶之理所奏知道了

二十二日工部議覆給事中永福參奏

行宮等處修理銀兩應將未經查核之堂司官交部

察議奉

上諭此係舊事伊等並不隱匿掩飾既將情由奏明著從寬免其交部察議嗣後凡此等事件俱著查出據實陳奏應治罪者朕卽治罪應免罪者朕卽從寬若將舊事隱匿掩飾不行查奏經朕查出必從重治罪  
二十三日奉

上諭今時值炎熱人易傷暑非寒冷時可比凡齊集諸臣聽擇陰涼處飲水坐候門俱洞開令得受風每日三次上食時年老者隨便齊集或因暑熱以致遲悞朕亦寬恕爾等職司稽察毋得過嚴此實

皇妣太后仁愛至意爾等務宜仰體倘有舛悞朕惟爾總



理事務王大臣是各命婦齊集處亦照此傳知

又

諭理藩院

皇妣天性仁慈衆所共知今

皇妣大事外藩公主郡主等蒙古王貝勒貝子公台吉等聞之自必速來伊等感戴

皇考

皇妣深恩竭誠來謁固所當然但時值炎熱蒙古內未出痘者甚多塗間急行人馬中暑到京或致有傷則重違

皇考

皇妣之聖心朕亦有所不忍將此傳諭蒙古各旗知之伊等斷不可來前者

皇考大事朕曾諭蒙古諸藩令於八月盡間來謁

山陵目前正值炎暑著停止前來蒙古王台吉內除未出痘者不必來外應來者於八月盡間來京伊等旗下地方亦屬緊要不可疎防來時或扎薩克或協理台吉必留一人辦事至公主郡主等間

皇妣大事有必欲來者亦不可急迫致傷人馬著從容前來

又

諭總理事務王大臣貝子允禩原屬無知狂悖氣傲心



高朕屢加訓諭望其自知改悔以便加恩但恐伊終不知改而朕必欲俟其自悔則終身不得加恩矣朕惟欲慰我

皇妣皇太后之心將允禩晉封爲郡王伊從此若知改悔朕自疊沛恩澤若怙終不悛則國法具在朕不得不治其罪伊亦難怨允禩來時爾等將此旨傳諭知之二十四日奉

上諭曰

皇考升遐之日十四阿哥不獲預襄大事無由盡心前朕恭送

梓宮留伊

陵寢附近湯泉居住俾得於大祀之日稍盡其心又欲保護其身體曾諭副將李如栢若阿哥欲不時往拜陵寢汝勿聽許若遇大祀遵奉朕旨則可令其前往前日太后體中違和朕遣侍衛吳喜朱蘭太召之令其速卽馳驛前來阿哥行至里許李如栢追而止之吳喜示以部文李如栢以部文內未載諭旨不足憑信將吳喜朱蘭太羈候請旨十四阿哥前旣不預

皇考大事今又不及預

皇妣大事不得盡其孝道實屬伊之不幸卽使李如栢不阻其行要亦不能及矣十四阿哥前已降旨封王副將李如栢遵朕前旨執法不回能止十四阿哥之行



誠謹可嘉十四阿哥一聞李如栢稱奉諭旨卽中止不前遵法可嘉再所差侍衛李如栢止之卽靜候諭旨亦屬甚是夫李如栢漢人也能知大義行事果斷如此公吳爾占宗室也奉

皇考命守咸安宮將

皇考所交之事不敬謹遵行藏匿

旨意欺罔行私二者相較吳爾占不堪極矣李如栢才具優長行誼篤實向來不逐時趨但知竭力報効

皇考不二其心朕所深知著給與翎子有要地總兵官缺出補用並傳諭看守咸安宮大阿哥處之王大臣管侍衛內大臣都統前鋒統領護軍統領武大臣步軍

統領等知之俾知大義所在理應守法奉公力改從前朋黨惡習

又諸王大臣等奏

仁壽皇太后仙馭賓天

皇上悲痛號踊連辰達旦水漿不御伏懇

皇上勉抑哀情保護

聖躬以慰天下臣民之望奉

上諭朕謹念

皇考付託重大不惟節哀而且強忍朕於

聖祖仁皇帝大事雖抑制哀衷尚勉盡臣子之道不意復遭



皇妣太后之事力實憊矣代朕計者亦謂難堪諸王大臣  
自應爲朕慮但朕思負荷重大務必節哀強忍保護  
朕躬以仰體我

皇考

皇妣罔極深恩上慰我

皇考

皇妣在天之靈爾諸王大臣勿過爲朕慮

二十五日奉

上諭除服以前每日伺候清晨親往

壽皇殿供獻

二十六日

諭禮部朕惟尊親之典首重易名聖善之修必崇顯號  
我

皇妣大行皇太后端莊恭肅慈惠安和奉侍

先皇壺儀茂著誕育冲藐

母道備隆顧復恩周命提義盡寬仁逮下澤洽宮庭謙儉  
持躬化流禁掖朕繼承大統嗣服鴻基方期合萬國  
之懽心奉

慈闈之色養不意遽遭大故

仙馭上升抱痛銜哀感深罔極惟藉顯揚之典少申孝慕  
之誠允宜稽考彝章薦升

尊諡應行典禮爾部詳議具奏



二十七日諸王大臣等奏

皇上日詣

壽皇殿親奠

仁壽皇太后梓宮悲痛迫切伏惟

皇上兩遇大事今又時當盛暑恭懇間隔兩三日

親詣一次奉

上諭朕性本質誠不事掩飾前云強忍節哀言實由衷  
斷不至過於哀毀罔恤朕躬欺爾諸王大臣也爾等  
勿爲朕慮但念

皇妣誕育朕躬慈恩罔極今初成服隔日一詣

梓宮親奠朕實難安按之典禮三次上食俱宜躬親今止

一次恭詣已勉從爾等所請矣每日清晨哭奠盡哀  
方得少展思慕

父母之心不如是朕不能忍反於朕躬無益倘不勝暑熱  
力不能支亦不勉強卽另降諭旨諸王大臣當諒朕  
此意遵行勿得再奏



雍正元年六月

上諭二十道

初二日

諭刑部熱審減等國朝舊有成例蓋念時當盛暑囹圄之地倍覺炎蒸笞杖所加更為酷烈故特予減等以昭法外之仁迨後日久弊生罪人妄希巧脫胥吏因緣為姦故延日期致逃法網是以停止熱審減等之例以杜弊端我

聖祖仁皇帝如天好生凡閱讞章哀矜詳慎秋審決囚屢行停止至每歲夏月必

特沛恩綸監候者寬其刑具枷責者緩至秋涼雖停熱審



之例仍寓減等之心恩至溥也朕仰體

聖慈時深欽恤嗣後每逢熟審之期仍復減等舊例其監禁重犯亦量加寬恤至情罪可疑及牽連待質人等暫予保釋嗣秋後再行拘禁凡內外讞獄衙門一體詳慎遵行庶幾刑期無刑之意其有故意遲延仍蹈前弊希圖漏網者除本犯不准減等外官吏嚴加議罪爾部卽通行直省

初八日

諭兵部進藏及克復臺灣有功人員其現在者俱已議敘惟已經身故者未得議敘同爲國家立功之人乃以身故之後不得均沾恩澤朕心深爲憫惻爾部著卽酌加議敘著爲定例以副朕褒錄有功之至意

又

諭理藩院郭爾羅斯之食議將鄰近札薩克公巴圖旗下倉糧撥給散賑等語殊未妥協如將公巴圖旗下倉糧撥給將來伊旗下若遇災旱又將何處米石撥給乎白都納倉糧頗多卽將此米散賑但止給與米糧餬口並無產業何以爲生向者給產業買牲餼之事俱派富戶富戶苟且塞責所給蒙古之物浮報數倍蒙古並不得實惠科爾沁一旗與其他蒙古不同太祖高皇帝時首先臣服且爲朕

皇曾祖妣孝莊文皇后

雍正元年六月

二



皇祖妣孝惠章皇后之母家世為國戚恪恭與順歷今百有餘年今聞伊屬下之人乏食朕心軫惻著即動用正項錢糧三萬兩往賑再派出大臣一員司官一員往郭爾羅斯旗下將實在窮苦並無牲餼之人查明數目按伊戶口足用之數給與乳牛羊隻此項牛羊或應買給或應折價令其自置並所派大臣官員爾衙門會同總理事務王大臣速議具奏

十二日戶部奏江蘇巡撫吳存禮以節年蠲免錢糧六案題請蠲免查得應准蠲免民屯地丁等銀外有不應蠲免銀一十九萬餘兩但與前奉

特旨蠲免康熙三十三年以前蘆課等項錢糧一例應

否蠲免請

旨奉

上諭此民欠地丁等項銀七百二十九萬六千餘兩外蘆課等項銀十九萬二千七百兩零雖不應豁免但此事歷年最久若行催徵窮民必致苦累著一併豁免

十三日

諭戶部兵部朕惟治安天下欲兵民並得其所必以敷恩減賦為要比年以來策妄阿喇布坦狂逞逆命發師致討四川陝西進藏官兵歷經險道往返萬有餘里甚屬勞苦朕深憫念其倒斃馱載馬匹價銀及口



外沿途與西藏留駐兵丁續補馱馬價銀著悉免追  
賠又西陲軍興以來民間急公趨事供應差役實厯  
朕懷聞陝西甘肅二屬各州縣衛所地丁銀兩每錢  
額外徵收三釐米每斗額外徵收三合以爲備荒之  
用此項徒有加賦之名而無賑濟之實著自雍正元  
年始將額外徵收銀米永行停止如有舊欠亦悉予  
蠲除爾部卽速行文該督撫遵諭奉行務俾均沾實  
惠以副朕篤念兵民至意

十四日戶部奏蘇松等處漕船過淮違限各官議  
處奉

上諭年來因雨澤歉少河內水淺以致運白漕船過淮  
違限運官等從寬免革職著該部將現議內有類此  
事者亦以免議具奏

十七日

諭工部據河南巡撫石文焯奏稱黃河南岸中牟地方  
河隄衝決近嵇曾筠從河南來朕問河南黃河形勢  
伊所奏尚明白卽著嵇曾筠前去伊若知有諳練河  
工之人著奏聞帶去再八旗漢軍現任官員捐納候  
選及註誤革職各員有情願往河工効力者令其作  
速遞呈該部儘數查開交與總理事務王大臣將家  
道殷實人材可用者挑選十人引見朕派出四五人  
交與嵇曾筠帶往嵇曾筠到河南時將此決口作何



堵築之處與河南巡撫石文焯總河齊蘇勒公同商  
議卽速修成決口以下州縣被衝人民應賑濟者亦  
卽速賑濟毋致失所河南預備河工錢糧自來無多  
此項工程卽將布政司庫正項錢糧動用工完之口  
查核銷算派出人員至河工時如果効力勤勞有河  
員缺出應保奏者卽行保奏補授若無缺出則具題  
議敘再將諳練河務者常留數員於工上自於緊急  
工程有益

二十日禮部題請

勅諭廷臣詳議

母后配

廟典禮奉

旨總理事務王大臣內閣九卿翰林院詹事科道詳查

典禮確議具奏廷臣遵

旨會議敬考古今典禮恭請

四后同祔

聖祖廟

尊諡並加仁字奉

上諭朕惟

母后升祔

太廟大典攸關欲伸臣子之孝思必準前代之成憲務得

情理允協乃可昭示萬年諸王大臣等奏請

雍正元年六月

五



四后同祔

太廟引據宋朝太宗真宗四后祔廟之禮朱子及有宋諸儒皆以為允當覽奏既得展朕孝敬無窮之心復合前代斟酌盡善之典不覺悲慰交集恭惟

孝誠仁皇后元配

宸極

孝昭仁皇后

孝懿仁皇后繼位中宮

孝恭仁皇后誕育朕躬母儀天下按先儒祔廟之議一元

后一繼立一本生以次並列今

母后升祔位次當首奉

孝誠仁皇后次奉

孝昭仁皇后次奉

孝懿仁皇后次奉

孝恭仁皇后如此庶於古禮符合而朕心亦安矣

二十一日奉

上諭貝子丹忠實心効力朕不忍違其遺本所奏是以將伊家眷及屬下之人俱交與四川提督岳鍾琪量加養贍安頓朕富有四海以天下為家豈有利其所屬之人之理今據侍郎常壽代親王察汗丹津奏稱丹忠係伊親姪請將所遺屬下歸併兼管詞意懇切著將丹忠屬下俱賜與察汗丹津管轄其一應人口



著岳鍾琪委員會同札薩克一二員查明數目令回原遊牧之地居住務俾各得其所勿致擾害至丹忠屬下寨桑等素著勤勞亦著岳鍾琪委員查明造冊送部俟秋涼時朕令伊等來京量加恩賞

二十二日河道總督齊蘇勒奏報河岸決口奉

上諭所奏中牟縣屬黃河南岸河水漫決前據石文焯摺奏朕遣兵部侍郎嵇曾筠選員與伊一同前往至河南將決口堵築之處會同河南巡撫石文焯河道總督齊蘇勒商酌動藩庫正項錢糧速築告竣已降諭旨至該督所奏山旰高堰一帶臨湖堤工恐河水下注泛溢復以黃河北岸關係運河作速加築保護

知道了今正值雨水之時該督帶領河員加意防護毋得疎忽

二十三日

諭總理事務王大臣朕前曾諭將江西省尾幫船糧截留山東二十萬石以備賑恤今聞東省百姓食米維艱涂天相回京奏稱路過東省民間米穀甚少山東巡撫並未具題朕念江西尾幫船隻須八月間方到彼時已及秋收恐此際百姓乏食著總理事務王大臣戶部與涂天相速行會議具奏

二十五日刑部等衙門奏馮子直因姦殺死阿爾免姦婦莫靈克知情應凌遲處死奉



上諭因姦殺死親夫知情未曾動手之婦人莫靈克擬以凌遲處死如幫助姦夫殺死親夫及本身自殺親夫者又當作何治罪大學士會同三法司查明律文酌議具奏

二十六日兵部議奏未經出口兵丁其倒斃馬匹仍令賠補奉

上諭保定府城守尉所屬滿洲兵丁古北口提標綠旗兵丁雖未出口亦勤勞四載有餘若仍令賠補馬匹朕心不忍著俱從寬免

二十八日

諭吏部兵部三年舉行大計五年舉行軍政其各官優者列爲卓異劣者分別輕重置之八法所以澄敘官方勸善懲過典至重也朕思卓異八法所舉所劾不過十數人而平等供職不列舉劾者尚有多員如文官倉庫之盈虧辦事之能否武官騎射之優劣訓練之勤惰皆未填註考語是考課羣吏尚有遺漏之處也嗣後大計軍政除卓異八法照舊例舉行外其平等官員文職自知縣以上武職自守備以上俱於大計軍政之年令督撫提鎮註明考語造冊報明吏兵二部務期秉公核實不得徇情任意顛倒是非爾等確議具奏

又



諭戶部各倉監督俱係限年滿漢一同更換立法最善前任若有未清後任豈肯接受所以稽錢糧之出入而除虧空之弊端也查通州坐糧廳有通濟庫每年動用輕賚等項銀數十萬兩關係錢糧亦屬緊要而坐糧廳一差並無年限更換或滿員陞轉則更滿員或漢員陞轉則更漢員滿漢參差更換彼此牽制回護勢難徹底清查况在任日久倘有虧欠必至積累增多更難清理爾部可將通濟庫錢糧逐一確查務期明晰其坐糧廳一差嗣後或限二年或限三年滿漢一同更換庶接受之際不至含糊而弊端亦不至久而益深也爾部卽確議具奏

二十九日奉

上諭奉天地方乃我國家啓祥之所甚屬緊要朕前詣奉天聞地方人言論悉知兵丁差役煩多不能休息之處曾降諭旨令將軍唐保住將無用塘哨悉行撤退唐保住雖將無用塘哨撤退而將軍副都統於定額親隨兵丁之外多帶百餘人省城官員又各帶其子弟因而屬員效尤各多帶兵丁以至應差乏人兵丁仍多勞苦又於鎗手中以選擇熟練之人爲名每城調取二三十人田獵夫省城相隔遙遠往返人馬俱疲再自山海關以致廣寧皇莊頭三百有奇止交筆帖式碩催等微末人員駐劄中後所催徵錢糧辦



理事務以致交結匪類糶賣官糧漁利入己且自中  
前所至錦州義州廣寧等處相隔二三百里詞訟案  
內干連之莊頭地方官調取抗不赴審即使到案亦  
抗不遵行以致案內干連之人每多苦累再人命案  
件呈報地方官之後雖相距數百里亦必俟筆帖式  
領催檢驗炎暑日久難以憑信則百方檢驗慘不可  
言朕之所聞如此從前雖每年派卿員前往管轄莊  
頭因不實心辦理於地方並無裨益應遣大臣一員  
駐劄於寧遠錦州大凌河等處地方令其料理一應  
公務管轄里長獵戶遇有詞訟事件會同地方官審  
結此所遣官員應令駐劄何處著領侍衛內大臣等

兵部總管公同詳議具奏

又

諭內閣朕惟人才難得務在矜全器使之道寸長卽錄  
每見外任文武官員一經督撫提鎮緣事叅革縱有  
才堪効用之人終身廢棄不能復用朕甚惜焉嗣後  
外任官員除特叅貪酷外其因公註誤降革解退之  
員將任內錢糧案件完結之後文官或吏才不足文  
學可觀雖不能臨民治劇尚堪以京職自効武職或  
有年力精強人材騎射足備驅使各自揣度本身分  
量尚可用者許其親赴都察院具呈著都察院十日  
一次彙題代爲陳奏朕當試其所長有可取者棄瑕



錄用以示朕憐惜人才至意

又

諭內閣凡旗員爲外吏者每爲該旗都統叅領等官所制自司道以至州縣於將選之時必勒索重賄方肯出結咨部及得缺後復遣人往其任所或稱平日受恩勒令酬報或稱家有婚喪等事緩急求助或以舊日私事要挾至五旗諸王不體恤門下人等分外勒索或縱門下管事人員肆意貪求種種勒索不可枚舉以致該員竭蹶餽送不能潔己自好凡虧空公帑罹罪罷黜者多由於此嗣後如有仍蹈前轍恣意需索等弊許本官據實密詳督撫轉奏督撫卽據詳密

奏倘督撫瞻顧容隱卽許本官封章密揭都察院轉爲密奏倘又不爲奏聞卽各御史亦得據揭密奏務期通達下情以除積弊外任旗員勿得隱忍畏懼朕不治以干犯舉首之罪著通行八旗直省督撫徧諭內外旗員知悉

又

諭理藩院塞外居住之八旗察哈爾蒙古護軍驍騎之器械三年查看一次而前往之護軍叅領驍騎叅領等騷擾蒙古勒索馬羊等物其三年一往比丁之官員亦有勒索之處朕所洞悉再察哈爾蒙古內未曾出痘者甚多若來京挑選護軍倘遇出痘恐有損傷



嗣後察哈爾八旗護軍缺出卽著察哈爾總管副總管叅領等公同閱看人材可用者挑補其挑補之護軍俟三年查看軍器時從京中奏派大臣一員前往查看軍器將所挑之護軍一併驗看其三年比丁亦照外省例交與該總管等詳查明白將比過丁數造冊送各該旗都統則衆蒙古無騷擾之患亦無往返京師之事於伊等大有裨益著八旗蒙古都統管侍衛內大臣前鋒統領護軍統領公同議奏

三十日奉

上諭朕去年親閱京通各倉雖有積貯但京師人民聚集食指浩繁米糧關係重大儲備不可不多查有漕各省惟湖廣江西產米最廣近年盛京年歲豐收米價亦賤此三處酌量動正項錢糧採買數十萬石僱募民船運送來京大有裨益著怡親王隆科多會同確查作何採買運送之處詳議具奏



雍正元年七月

上諭二十六道

初六日

諭八旗都統等八旗世襲佐領及世職官員有年幼者於供職之處未曾歷練若不令人指教何由諳習規矩以底於成就嗣後凡十六歲上朝之佐領著委令一員率領指教俟四五年後再令其自行供職其十八歲上朝之世職亦令委員指教俟三年後再令其自行供職將此通諭八旗都統等各當盡心教育一體遵行

初七日

雍正元年七月



諭禮部國家祀典必貴潔誠

先農壇每歲展祀且爲親耕耨田之所最宜清肅舊制圍墻內有地一千七百畝以二百畝給壇戶種植五穀蔬菜以供祭祀餘一千五百畝每年交租銀三百兩以備修理聞康熙四十年間內務府撥給園頭耕種黍盛蔬菜無所從出惟向市井採買殊非潔淨精誠之意今著園頭清還地畝仍給太常寺壇戶耕種以供祭祀之需餘地一千五百畝著將內外圍墻查明丈人每種地十畝估計令其修墻若干務期加謹葺護毋致傾壞每年將滿漢太常寺少卿派出一員不時稽察庶壇墮清潔祀事更加虔謹矣

又

諭工部貢院內應用桌椅等器向俱五城借用民間之物頗爲擾害用過給還之時又被蠹役多方勒索以致各寺廟及買賣人等種種苦累此等應用之物當交與工部備造一分俟考試之年取用事竣交回部內加謹收貯若典守人員懈怠以致毀壞遺失卽令賠補數年後將舊物更換則桌椅等器全得整齊小民等亦免衙役勒索之苦此雖係小事該部大臣理應留心辦理若諸事漫不留心只圖僥倖保全官職朕前豈能僥倖何益之有今特降諭旨勿謂朕躬親細事轉相竊笑也該部議奏



初八日戶部遵

旨議覆遣官往

盛京江西湖廣採買米糧奉

上諭南方差漢御史或給事中一員動正項錢糧買米  
僱覓民船運來此項米石買畢卽行起運趕上漕船  
可以先到卽先來如其不能在何處遇見卽隨便行  
走此係官買之米若交與地方官恐派累小民亦未  
可定不必交與地方官運送著派同知通判等官一  
員協同買米之員管運到京武職內派守備一員押  
運到淮之日總漕處派守備一員更換盛京差滿官  
一員去近據內府佐領等奏稱現今莊頭等將窖米

一十一萬五千四百八十四石糶賣一半其餘一半  
米石暫行存貯俟得新糧於次年糶賣再庫內現存  
銀內留下七千五百餘兩其十萬兩交與何處請旨  
此派去之員一到盛京將錦州等處將軍府尹所管  
內府佐領所存米石查看總數於近海口處兌十萬  
石卽將內府佐領等所存庫銀動用僱覓民船裝運  
如倉內現存米石數目不敷動盛京錢糧買米運送  
再天津衛係總會之所理應修建倉廩其應建幾倉  
之處八月間送

梓宮時爾等面傳諭旨與直隸巡撫著直隸巡撫會同天

津總兵官定議具題建造



初九日

諭戶部兵部從前商人王綱明因虧空銅斤銀兩具呈願採買兩江浙閩湖廣五省營驛馬匹於每匹額價內節省三兩填補虧空後五省以王綱明所交之馬疲瘦不堪易於倒斃題請仍自行採買每匹扣銀三兩交部爲王綱明補墊虧空此事雖行已數年但各省採買額價不敷不能採買臚壯營驛之馬恒至倒斃以致地方官員歲有賠累况商人王綱明虧空銀兩與各省地方官員何涉而代爲補墊除從前五省解部補墊銀兩外以後每匹扣銀著俱行豁免其王綱明尚欠銅斤銀兩若干該部作速查明著落王綱明等名下作何清結之處另行議奏

又內閣覆奏折本內兵部議給大臣官員等廕生奉

上諭郎圖善代達福鏗特胡世屯大成俱著給與三品廕生伊等承襲祖父高爵其子孫習於安逸未必卽能効力行走若給伊等一二品廕生以員外郎主事用恐不能稱職與其被堂官叅革不如給與三品廕生補用令其學習行走豈不甚便如將來任事果優彼時朕自有加恩之處此正朕成就伊等之意並非吝惜一二品廕生而不給與也爾等傳集伊等宣諭朕意否則徒生怨言且嗣後之効力人員反生懈心



矣

十一日

諭內閣朕前降諭旨因年羹堯奏稱趙之壇情願捐銀一萬兩往布隆吉爾地方築城効力朕念趙之壇係功臣之後若伊才具不克勝知府之任道員事簡易辦欲捐銀議敘以道員用可聽其効力若趙之壇才克勝任卽仍留知府川現今趙弘燮虧空庫銀三四十萬兩交與趙之壇料理又何必另外捐銀此朕施恩之意也况年羹堯啓奏築城已有張連登王之樞等可以竣事今復遣往効力議敘似又開一捐例斷不可行若布隆吉爾築城張連登等所捐之貲不克完工今年羹堯密摺指具奏再將情願効力者發往此朕之諭旨也爾等票簽全不符合將朕緊要語句俱行遺漏總之大學士等不肯盡心辦事及至錯悞在乾清門免冠謝罪甚屬非體爾等俱係

聖祖仁皇帝委任大臣

聖祖仁皇帝天縱生知兼之臨御日久諸事精熟爾等舛錯之處全賴

聖祖仁皇帝改正所以不至悞事今朕臨御之初內藉大學士外藉督撫提鎮爾等理應諸事勤慎盡心協辦如前日本上落去一字事雖甚小然不得謂小事便可輕忽寫本雖係中書之事爾等肯用心細閱自無



錯悞若大學士諉咎於學士學士諉咎於侍讀侍讀  
諉咎於中書則朕亦可諉咎於大學士諸事錯悞令  
天下人疑朕與大學士俱不看本豈不可恥又如前  
日蔡珽所奏之事卽係年羹堯奏過之事爾等又稟  
該部議奏朕疑其事或有異同照簽批發及觀部議  
仍是一事可見漫不經心此等之處大學士既不詳  
看學士等亦應詳看何一同玩忽至此朕若亦如爾  
等玩忽督撫本章概批依議用人一途聽之九卿隨  
意保舉豈不省事但爾等可以負朕朕何忍負我

**皇**考之深恩乎况朕於爾等陳奏虛心採納並未有偏執  
之處朕非文過飾非之人人非聖賢孰能無過爾等

果能指摘朕過朕心甚喜君子之過也如日月之食  
人皆見之及其更也人皆仰之改過是天下第一等  
善事有何繫吝以籍結爲老成以退諉爲謹慎非朕  
所望於爾等之意總之三年之內將向來怠玩積習  
務須盡改倘仍付之膜外不肯改易不特國法難宥  
卽天理亦所不容矣

又

諭戶部朕惟治民之道在愛養民力蓋民力寬舒則元  
氣自復此裕阜之要務也山東山西河南三省連年  
田稼歉收朕軫念窮黎已發帑賑濟復將現年錢糧  
盡行緩徵而歷年民欠帶徵之項若仍行追比緩新



而徵舊與兆姓終無裨益目今時雨霑足秋禾滋茂登穫在望俾耕鑿小民終歲無催斂之煩家室有益藏之慶則力既有餘輸將亦易來年自必急公完賦爾部將山東省康熙五十八年至六十一年分年帶徵未完錢糧山西省康熙五十六年至五十九年分年帶徵未完錢糧河南省康熙五十九年至六十一年緩徵錢糧作速行文三省巡撫俱著停徵一年務使里井霑恩吏胥無擾以副朕愛養民力之意爾部卽遵諭行

十二日

諭戶部朕自臨御以來勤求民瘼事無鉅細必延訪體

察務期利民而於徵

收錢糧尤爲留意惟恐間閭滋

擾此念時切於懷如山西省有漕米各州縣運糧到省又自省倉搬上軍船故有脚耗扒夫修倉鋪墊等項編載全書歷來支給已久自康熙二十三年部中誤駁不准支給行令追還嗣後一例駁追究無完解至三十四年

至祖仁皇帝特頒諭旨將從前已經支給者俱免追賠恩至渥也至康熙三十八年部議又以脚耗與扒夫等項分晰未清仍令扣追不知脚耗乃貼運之總名扒夫等項乃支給之細數實一事非兩項也自康熙三十八年至今已二十餘載應追銀五十一萬餘兩米



六十一萬餘石積累增多究無完解追比日久官民均受其累朕知之甚悉特諭爾部將從前積欠盡免追賠向後准其支給副朕加惠黎元體恤有司之意

十三日奉

上諭都統前鋒統領護軍統領副都統內頗有家計艱窘之人頃者外省副都統等既已酌給親丁坐糧將如何酌給伊等坐糧之處著總理事務王大臣等會同兵部議奏

又

諭倉場侍郎糧運關係國儲必須進行無阻始得及早抵通自揚村至通州河道多有淤淺糧船起剝每至

耽延以致回空凍阻并誤新漕著該督嚴飭坐糧廳

查看河道有淤淺處作速挑濬深通毋使阻滯并知會天津總兵官用心催趕且天津一帶地方向有販賣私鹽等弊糧船不許停泊火速趨行直抵通州至抵通後速行起卸交倉毋得需索抑勒苦累軍丁朕去年親自閱倉知漕糧過壩一晝夜可五萬袋可見交卸甚易爾等加意督催務使空船早得回南新漕亦可無誤漕運一事朕親身閱歷纖悉洞知爾等倘不盡心料理或因勒索致有遲延責無所諉

十四日

諭禮部朝鮮國歸順我朝以來恪盡藩職進貢年久在



太宗文皇帝

世祖章皇帝

聖祖仁皇帝時屢次施恩將伊國貢物減免今所貢禮物尚多此內若有可減去者爾部會同內務府確議具奏再加減免以紓朝鮮民力

又

諭朝鮮國使臣密昌君李檝爾朝鮮國王啟疆東土於我

太宗文皇帝時誠心豫附恪守藩封我

太宗文皇帝

世祖章皇帝視同一家恩施優渥爾國王祖父亦能仰承

厚澤奉職惟謹百年於茲矣我

聖祖仁皇帝化成久道萬國來王念爾國君李焯幼纘嗣

服克紹前猷權不下移惠能撫衆數十年來職貢匪

懈用是

隆恩異數寵眷有加賚予便蕃貢物頻減病則賜之以珍

藥歿則錫之以榮名

特遣近臣優頒奠弔今朕纘承大統爾嗣王李昫遣爾恭

進賀表朕嘉爾嗣王忱悃肫篤又念爾係嗣王宗族

特行召見以示優禮爾歸告爾嗣王繼乃祖父之緒

夙夜黽勉慎守綱維母替厥服長爲屏翰不忘恭順

克殫忠誠朕必體



列聖怙冒弘仁俾爾遠藩保安全於永久

十五日奉

上諭欽差出京沿途地方官向有餽送督撫派於州縣州縣派於里民朕深知此弊於散賑催漕看河各欽差大臣官員出京時皆逐一諄諄告誡不令騷擾地方官民但恐陽奉陰違又恐地方官畏懼以不敢忽畧欽差之故仍蹈前轍且差去之大臣官員卽能潔已自持而隨從人役未必盡能遵奉至欽差事畢回京之後督撫或借欽差公費名色開單分派州縣州縣不敢問其虛實州縣轉派里民里民不敢爭其多寡甚至以科派贏餘或填虧空或充節禮種種弊端

深可痛恨著各自督撫於欽差經過之地卽將所發上諭大張告示遍貼通衢嗣後欽差務期恪遵訓諭嚴束人役毋得騷擾地方需索餽送如欽差本無需索州縣官借名私派里民及暗加火耗者著卽指名題叅至督撫身爲大吏尤宜廉潔率屬倘有扶同苛派致擾民生者一經查出決不姑貸

十六日奉

上諭看來下五旗諸王將所屬旗分佐領下人挑取一切差役遇有過失輒行鎖禁籍沒家產任意擾累殊屬違例

太祖

雍正元年七月

十



太宗時將旗分佐領分與諸王非包衣佐領可比欲其撫循之非令其擾累之也從前朕之伯叔爲諸王時雖漸失初意尚未過甚至朕兄弟輩所分包衣佐領之人既少而差役復多因而不論旗分佐領包衣佐領一概令其當差其餘諸王遂亦從而效之或有不肖王等因漁色之故多斃人命人所共知且護衛等尚無不奏而擅行革退之例如此日流而下則五旗之人竟有二主何以聊生所關甚大嗣後仍照舊例旗分人員止許用爲護衛散騎郎典儀親軍校親軍或諸王挑取隨侍之人或欲令所屬人內在部院衙門及旗下行走者兼管家務或需用多人以供差役或

補用王府官職或令隨侍子姪著列名請旨將奉旨之處知會該旗都統等令都統等覆奏其旗分人員不許擅行治罪必奏聞交部如不請旨斷不可也倘有仍將旗分人員妄行擾累令其多供差役兼管散職著該旗都統等奏聞若都統等隱匿瞻徇一經御史叅劾卽將該都統等治罪

十七日

諭大學士等史書務紀其真而史才古稱難得蓋彰善癉惡傳信去疑苟非存心忠厚學識淹通者未能定得失於一時垂鑒戒於久遠也有明一代之史屢經修纂尚未成書我



聖祖仁皇帝大公至慎之心旌別淑慝務期允當惟恐幾  
微未協遂失其真鄭重周詳多歷年所冀得良史之  
才畀以編摩之任朕思歲月愈久考據愈難目今相  
去明季將及百年幸簡編之紀載猶存故老之傳聞  
不遠應令文學大臣董率其事慎選儒臣以任分修  
再訪山林績學之士忠厚淹通者一同編輯俾得各  
展所長取舍折衷歸於盡善庶成一代信史足以昭  
示於無窮著將滿漢大臣等職名開列具奏

又

諭工部沿河州縣向有額設河夫自百名至數十名不  
等興工則併力濬築工停則分遣巡防損者隨補塌  
者隨培修搶擁護俱係熟諳夫役故雖偶有衝決不  
能爲患近聞管夫河官侵蝕河夫工食每處僅存夫  
頭數名遇有工役臨時僱募鄉民充數塞責以致修  
築不能堅固損壞不能隄防冒銷誤工莫此爲甚嗣  
後著總河及近河各省巡撫嚴飭河道不時稽查按  
冊覈實禁絕虛冒倘有仍前侵蝕貽誤河防者卽行  
指名題叅

十八日工部奏銷永定河劉又口挑淺及京口營  
整理船桅等錢糧奉

上諭所奏甚不明白若從前所議非是卽當於此本內  
直陳其非是之處今不行直陳是徒欲市恩邀譽而



已凡辦理國家事務君臣務須一體假使君有未是而臣居其是或君居其是而臣有未是此皆足貽笑於天下可將此事詳察議奏

又御史湯之旭條奏律例欸項請酌定畫一刊刻成編頒示天下奉

上諭此所奏律例畫一之事未嘗不是但天下事有治人無治法得人辦理則無不允協不得其人其間舞文弄法正自不少誠能秉公無私何患條例之繁假若陶賴孫渣齊勒什布赫成格等辦事雖條例畫一弊終難免著大學士等會同總理事務王大臣及刑部都察院詳酌密奏

二十二日奉天照川軍唐保住叅奏虧空錢糧各官應照數追完奉

上諭將軍唐保住將虧空錢糧之存住等叅奏甚是歷年以來諸臣不知感戴

皇考寬厚慈祥之恩轉以侵盜國帑勒索小民之事視爲故常此等相沿惡習朕必力加整理此案係已往之事是以但加申飭倘三年之後尚有如此敗露者必正典刑斷不寬宥爾等宜深悉朕心凡事須秉公辦理

二十六日總兵林國賢請以伊子改入南陽民籍兵部議奏應不淮行奉



上諭林國賢准加贈右都督伊子准入河南南陽民籍嗣後提督總兵副將等官仍照例不許在任置產入籍外其叅將以下俱係微員任所縱有房產諒亦微薄若概行勒歸原籍必致困累爾等同九卿定議具奏

又福州將軍宜兆熊奏請福州駐防協領等缺將挨次應陞人員送部補授兵部議奏應不淮行奉上諭據宜兆熊所奏亦似近是各省城守尉缺出止將此一缺應陞之人咨送到部補用發回之後始將此陞缺應補之人咨送到部如此則缺既久懸而往返行走亦擾累驛站嗣後協領叅領佐領缺出仍照常

循例將保送之人與本旗應陞之人一併引見其防禦以下等官照年滿千總例該將軍等於驍騎校領催內揀選人材可用能管轄兵丁者著來京引見記名者候缺出免其引見依次題補爾等會同總理事務王大臣兵部定議具奏

二十八日戶部以蠲免項內蘇太屬下衛所舊欠屯折等項錢糧請

旨奉

上諭未完屯折銀二萬四百九十餘兩內存留俸工銀一千二百九十餘兩雖不應豁免但此事歷年已久該撫既稱實係拖欠在軍著一併豁免



二十九日

諭諸王大臣及內外文武各官朕惟自古帝王撫御寰  
區治化隆盛中外臣民紀功述德頌禱情殷故天保  
之詩卷阿之什擬升恒於日月期純嘏之彌長祝釐  
之詞形諸歌詠者往往有之我

聖祖仁皇帝御極六十餘年至治神功參兩

天地深仁厚澤超邁百王薄海內外無不食德飲和淪肌  
浹髓臣工黎庶無以致其感激愛戴之誠故每於

萬壽聖節京師暨直省各建道場誦經祝壽總因

聖祖仁皇帝恩德及人者至久感人者至深諸臣於無可  
報答之中勉竭忱悃以普天同慶之心儆華封稱祝

之意在諸臣亦藉以自盡其心耳今朕嗣位之初夙  
夜祇懼不敢少懈所以立政圖治者安能及

聖祖之萬一爾諸臣工於朕誕日倘仍照從前建立道場

則自此以後將成定例在京王公以下及部院等官  
未免從事靡文稽遲公事在外交文武大吏亦恐科派  
屬員貽累地方且以有用之財供無益之費既非朕  
以勤儉勵有位之心又非朕以康阜期海內之意尚  
虛文而無裨實政朕甚無取焉特宣布中外於朕誕  
日毋得建立祝壽道場但冀內外諸臣各殫厥心勉  
襄化理勤修職業利濟蒼生以慰朕宵衣旰食之焦  
勞卽不啻天保卷阿之祝頌矣若不遵諭旨朕必加



以處分不少寬貸

又

諭大學士等藏地兵馬已撤計程將至內地從前統領兵馬之大臣怠忽者多縱兵橫行騷擾民人種種無恥之行朕所深知著嚴行該地方官並統領兵丁之大臣若不各自約束仍縱所屬兵丁跟役任意或前或後行走逞強搶奪肆無紀律地方官於何處拏獲卽將該管官一併拘留該處請旨將統領之大臣從重治罪若地方大臣徇情隱蔽朕別有訪聞將地方大臣官員一併治罪將此諭旨明白曉諭兵馬經行各路軍民知悉

又

諭禮部湖南士子赴湖北鄉試必經由洞庭湖湖水浩瀚無涯波濤不測六七月間風浪尤險間有覆溺之患朕心甚爲惻然或至士子畏避險遠裹足不前又非朕廣育人材之意今欲於湖南地方建立試院每科另簡考官俾士子就近入場永無阻隔之虞共遂觀光之願明年二月爲鄉試之期爾部可卽行文湖南巡撫若能於二月之前預備場屋則於明春卽分湖北湖南兩闈考試倘爲期已迫預備不及則於下科舉行至於湖廣通省取中原有定額今旣分兩闈其取中之數應如何分別之處著湖南湖北巡撫公



議湖廣總督從公酌定具奏

雍正元年八月

上諭二十道

初二日

諭各鹽政官員國家欲安黎庶莫先於厚風俗厚風俗  
莫要於崇節儉周禮一書上下有等財用有度所以  
防僭越禁驕奢也孟子亦曰食時用禮菽粟足而民  
無不仁朕臨御以來躬行節儉欲使海內之民皆敦  
本尚實庶康阜登而風俗醇夫節儉之風貴行於閭  
里而奢靡之習莫甚於商人朕聞各省鹽商內實空  
虛而外事奢侈衣服屋宇窮極華靡飲食器具備求  
工巧俳優妓樂恒舞酣歌宴會嬉遊殆無虛日金錢

雍正元年八月



珠貝視爲泥沙甚至悍僕豪奴服食起居同於仕宦越禮犯分罔知自檢驕奢淫佚相習成風各處鹽商皆然而淮揚爲尤甚使愚民尤而效之其弊可勝言哉爾等旣司鹽政宜約束商人嚴行禁止出示曉諭諄切勸誡使其痛自改悔庶循禮安分不致蹈僭越之愆而省一日之糜費卽可以裕數日之國課且使小民皆知警惕敦尚儉約於民生亦有裨益庶不負朕維風振俗之意若仍前奢侈不知悛改或經朕訪聞或被督撫叅劾商人必從重究治爾等亦不能辭徇縱之咎

又

前名關差官員國家之設關稅所以通商而非以累商  
所以便民而非以病民也朕撫御寰區加惠黎庶惟恐民隱不能上達近聞權關者往往寄耳目於胥役不實驗客貨之多寡而止憑胥役之報單胥役於中未免高下其手任意勒索飽其欲者雖貨多稅重而蒙蔽不報者有之或以重報輕者亦有之不遂其欲雖貨少稅輕而停滯關口候至數日尚不得過是以國家之額稅聽猾吏之侵漁以小民之脂膏飽奸胥之谿壑司其事者竟若罔聞知乎又聞放關或有一日止一次者江濤險急河路窄隘停舟候關於商民亦甚不便嗣後權關者務須秉公實心查驗過關船



隻隨到隨查應報稅者納稅卽放不得任胥役作弊  
勒索阻滯以副朕通商便民之意至於崇文門收稅  
及分派各處查稅之人亦有多方勒索分外苛求之  
弊京師爲四方輻輳之地行李絡繹豈宜苛刻滋擾  
監收者尤當不時稽查杜絕弊端爾等若不遵諭旨  
經朕訪聞定行重治其罪

初三日御史孫塔等題叅戶部事件違限奉

上諭從前戶部堂官將部中事件累百壅積怠玩不理  
自怡親王辦理戶部事務於展限四十日之內一切  
積弊剔除殆盡獎勵屬員清理數千案件甚屬可嘉  
卽使偶然遺漏一二小事不但無庸議處其清理如

許事案尙應議敘察議之處著從寬免至御史孫塔  
等以逾限題叅如此方是凡勤敏効力之人偶有過  
失姑從寬宥其權在朕大學士亦不得徇庇情面草  
率歸結至於戶部職掌皆係銷算會同稽考錢糧之  
事較於別部加倍繁多非如銓選地方員缺等項可  
比似應稍展限期得細加察核於事更有裨益著都  
察院科道將戶部事件展限歸結之處另行定議具  
奏

初九日內閣侍讀學士田文鏡賑濟山西事竣將  
借帑之處回奏奉

上諭山西省平陽府屬之霍州靈石汾州府屬之平遙



介休石樓潞安府屬之襄垣黎城太原府屬之平定沁州屬之武鄉九州縣借賑過饑民銀六萬五千六百七十七兩盡行豁免不必令還著戶部行文該撫出示曉諭咸使聞知

初十日

御筆親書

景陵碑匾復

命誠親王淳親王及翰林中善書者恭寫乃召九卿及南書房翰林至

乾清宮

上諭曰

景陵碑匾事關重大誠親王淳親王素工書法朕已令其

恭寫翰林中善書者亦令其恭寫朕早蒙

皇考庭訓每做學

御書嘗荷

嘉獎今

陵寢碑匾朕亦敬謹書寫非欲自耀已長但以大禮所在不親寫於心不安爾諸臣可公同細看不必定用朕書須擇書法極好者用之方愜朕心

十二日

諭兩江總督查弼納江南提督高其位署江蘇巡撫何天培浙江巡撫李馥太湖三萬六千頃連跨數郡地



勢既廣支流復多爲盜賊出沒之所平時既易藏奸  
巡捕又難著力故蘇常盜案多於他省良善被擾官  
吏處分皆因太湖爲之巢穴也爾等均有統轄之責  
可公同確議遴選賢員清查嚴緝俾匪類就擒餘黨  
解散日後作何稽察防範之法不使宵小復萌地方  
長享寧靜之福以副朕禁盜安民之意

十四日奉差閩河大學士張鵬翮等奏豫省北岸  
欽堤關係黃沁並衛河運道理合保固再秦家廠大壩北  
尾堤應築堤一道接連遙堤庶溢出之水不致下  
注又遙堤單薄應再加幫築奉

上諭曰

聖祖指示釘船幫挑水壩既應保固卽當從壩尾接至遙  
堤若從秦家廠北壩尾接至遙堤恐其兜水其秦家  
廠月堤與從中填實工價應行估計之處著派一員  
前往與齊蘇勒嵇曾筠石文焯議奏圖本一併賚去  
十七日

諭總理事務王大臣大學士九卿我

聖祖仁皇帝爲

宗社臣民計慎選於諸子之中命朕纘承統緒於去年十  
一月十三日倉猝之間一言而定大計薄海内外莫  
不傾心悅服共享安全之福

聖祖之精神力量默運於事先貫注於事後神聖睿哲高



出乎千古帝王之上自能主持若朕則豈能及此也  
皇考當日亦曾降

旨於爾諸臣曰朕萬年後必擇一堅固可託之人與爾等  
作主必令爾等傾心悅服斷不致貽累於爾諸臣也朕  
自卽位以來念

聖祖付託之重

太祖

太宗

世祖創垂大業在於朕躬夙夜兢兢惟恐未克負荷向日  
朕在藩邸時坦懷接物無猜無疑飲食起居不加防  
範死生利害聽之於人蓋未任天下之重自視此身

甚輕今躬膺

聖祖付託神器之重安可怠忽不爲長久之慮乎當日

聖祖因二阿哥之事身心憂悴不可殫述今朕諸子尚幼  
建儲一事必須詳慎此時安可舉行然

聖祖既將大事付託於朕朕身爲

宗社之主不得不預爲之計今朕特將此事親寫密封藏  
於匣內置之乾清宮正中

世祖章皇帝御書正大光明匾額之後乃宮中最高之處  
以備不虞諸王大臣咸宜知之或收藏數十年亦未  
可定諸王大臣等當各竭忠悃輔弼朕躬俾朕成一  
代之令主朕於爾等亦必保全成就篤厚恩誼豈非



家國天下之大慶乎朕意若此諸王大臣其共議之  
又兵部奏平定西藏人員議敘奉

上諭平定西藏乃自古未至之絕域所以

皇考曾有從優議敘之

旨况

皇考當春秋高邁備兵於極邊宣揚威畧峻德鴻功允垂  
億萬斯年之美政也此一次議敘軍功前固無例可  
援後亦不得爲例兩路率領八旗官員進勦之將軍  
等著給與世襲三等阿達哈哈番議政大臣給與拜  
他喇布勒哈番副都統營總等給與拖沙喇哈番其  
護軍校驍騎校給與頭等功牌二面仍加一級綠旗  
官員經大將軍等咨送冊開頭等者照攻取打箭爐  
功加一倍二等者功加五等三等者功加二等至於  
滿洲漢軍綠旗之外委官俱係一體効力人員無論  
由部委外委概行從優議敘以仰副我

皇考恩綸特沛從優議敘之

諭旨

十八日兵部奏議敘克復臺灣人員奉

上諭臺灣地方自古未屬中國

皇考聖略神威取入版圖逆賊朱一貴等倡亂佔據臺地  
皇考籌畫周詳指授地方官員遣調官兵七日之內勦除  
數萬賊衆克復全臺



皇考當春秋高邁威揚海外功德峻偉官兵感戴

皇考教養之恩奮勇攻取甚屬可嘉固不必援引前例後亦不得爲例茲仰副

皇考從優議敘之曠典官員現行議敘功加外著概行各加一等總督滿保雖有失陷地方之罪但一聞事發卽親往廈門撫慰衆心遵依

皇考指示調遣官兵七日之內克復臺灣滿保著兼兵部尚書職銜提督施世驃統領大兵徑度海洋鼓勵將士屢經大戰擊敗賊衆七日之內克復臺灣厥功甚大施世驃著給與世襲頭等阿達哈哈番總兵官藍廷珍曾協助施世驃藍廷珍著給與世襲三等阿達

哈哈番水師營副將許雲失守臺灣非伊罪奮勇前進多殺賊衆身又陣亡著給與世襲拜他喇布勒哈番叅將羅萬倉遊擊游崇功俱係陣亡羅萬倉游崇功著給與世襲拖沙喇哈番歐陽凱著追贈太子少保

二十二日

諭議政大臣爾等所議之事皆國家要務理宜慎密今議政大臣議尚未行早已洩漏人人皆知於稠衆之中會議奴隸亦不迴避可乎嗣後王大臣議政務宜慎密在議政處執事之司官筆帖式等亦宜嚴加訓飭如有似此洩漏者朕若訪聞必重治其罪不貸



又管理藩院侍郎事都統拉錫奏喀爾沁等處歲  
歉乏食請俟查覆到日賑濟奉

上諭據奏俟查覆到日加恩拯救現今乏食人等必至  
失所著戶部作速派官二員領銀五萬兩前往再著  
侍郎本錫副都統阿林保作速馳驛前往喀爾沁俟  
錢糧一到即行散賑扎薩克八處俱一面清查一面  
給發毋得稽遲

二十三日奉

上諭恭謁

景陵時昔日

聖祖仁皇帝前親近之諸王大臣悉令得人

隆恩門至

享殿前叩謁 又奉

上諭蒙古諸王俱因

梓宮安奉

地宮竭誠叩謁著分爲四班每日引一班進謁

二十四日奉

上諭

皇太后素性謙謹事

聖祖仁皇帝數十年未嘗少懈今暫安奉

皇太后梓宮於蘆殿

享殿內現奉



聖祖仁皇帝梓宮

皇太后前一應供獻及祭文不可由中門出入俱應於西門行走以仰體我

皇妣謙冲至意

二十五日奉

旨翌日仍詣

景陵諸王滿漢大臣奏云昨日

皇上躬詣

三陵至

景陵哀痛過甚今日復詣

陵致祭

聖躬已極勞瘁况二十七二十九初一等日均屬大祭

二十六二十八兩日伏乞停止

親往奉

上諭

梓宮於初一日安奉

地宮及今每日親往尙得瞻仰

梓宮過初一日則不得瞻仰矣明日朕仍親往 諸臣復

奏云恭聞

聖諭 臣等何敢再奏但昨日謁

陵時蒙

恩召近



梓宮舉哀親見

皇上聖心悲切號泣不止哀勞太過臣等不勝悚懼二

十九初一兩日禮數尤多大典攸關伏乞

皇上於二十六二十八兩日停止

親往奉

旨諸王大臣陳請再三此兩日暫停親往

二十六日奉

上諭曰

聖祖仁皇帝鹵簿內備鞍之御廐馬匹送至達里剛崖櫪

養終老此馬俱曾經

考乘騎著敬謹交與福壽牧養若有私自騎用及抵換

者事發卽行處斬

二十八日

上以九月初四日

聖祖仁皇帝升祔

太廟

欽命大學士等恭點

神主奉

上諭點主一事所關最重古人必取名望素著德行純

粹學問淵深者充此職任今爾等位既貴顯人品皆

優故簡命爾等爾等當體朕敬重之誠勿視爲差委

故事須潔誠齋戒屏却思慮一塵不染



聖祖在

天之靈陟降上下爾等誠意所聚一若

聖祖神靈洋洋如在方副朕一片孝思爾等不必有意於

哀慟亦不必有意於恭敬亦不必有意於感格只以

一誠默契為是

二十九日

諭各蒙古王貝勒貝子扎薩克台吉他布囊等自爾祖

宗歸附

太祖

太宗以來蒙被聖化於茲五六代矣世締國姻恩深祿重

兄弟主臣洽比保聚安居樂業百有餘年其間厄魯

特噶爾丹猖獗美兵破喀爾喀七旗侵及內扎薩克

蒙古蹂躪遊牧之地

皇考為爾等三次自將出師乃滅噶爾丹使爾等永享太

平之福六十餘年以來爾等屬下偶有饑饉災傷莫

不發帑與糧資給畜牧更派富戶屯田代耕使饑者

復安散者復聚非一次矣

皇考養育爾等蒙古恩澤重矣大矣曩者郭爾羅斯以歲

饑聞朕仰體

皇考聖意即遣大臣前往發倉賑救置備牛羊給賞今喀

喇沁翁牛特八旗又以歲饑聞復遣大臣前往即速

查明饑口動用正項錢糧買米散賑夫一時阻饑朕



雖賑之長年貧乏之民在爾各君長於本旗內哀多  
益寡互相賙恤以養育之庶幾得所耳若不知各子  
其民思所以養育之道仍然厚斂重徭納之於阡危  
之域而恃天朝之賑恤不特爾衆失所又重違朕愛  
養斯民之至意矣雖曰爾之屬下乎乃皆我

皇考歷年豢養之民也豈可使之至於散亡况爾屬下盡  
散孰爲爾等納賦孰爲爾等供徭愛民惠下是第一  
要務不可不知也連歲災旱頻仍今年又遭饑饉爾  
等各子其民者如何減賦如何輕徭如何裕其農功  
如何孳其畜牧爾等王員勒大臣等議定務使各得  
生理以仰副我

皇考聖心以慰朕心定議之後倘有顯背公議仍然重賦  
苛役者爾等自思朕其奈何國法具在非朕所得而  
私也爾等共相勸勉互相輔助遵諭奉行我

皇考日覩爾等長成愛如子孫事事包容處處軫恤爾等  
視

皇考如祖父恃

皇考之慈愛每事懈逸朕新卽位務須各盡爾職謹慎小  
心管轄屬下訓練兵丁嚴禁盜賊奉公守法循分安  
生仰報我

皇考軫愛之恩俾朕得以仰法

皇考慈惠爾等至意始終保全永永勿替朕之願也今日



特於

皇考梓宮前諭爾等知之

雍正元年九月

上諭十六道

初一日工部奏康熙二十六年起五十八年七月  
止曾任木倉監督人員所虧木植一槩著落追賠  
照律治罪奉

上諭木植事件舉國皆知此內亦有屈枉者亦有實在  
可恨者該部應分晰明白具奏如一槩寬免則不肖  
之徒得以僥倖若俱各治罪其中屈枉人員不無可  
憫王大臣必要除私秉公加謹查核方得明白

初五日

諭禮部自古祖功宗德制在不祧饗帝饗親祀應並舉

雍正元年九月



報本之情罔極配

天之典宜隆仰惟我

皇考聖祖仁皇帝寬聰御宇至德誠民早歲而攬弘綱恩  
覃無外小心以勤昭事誠著升中

寢園備物於春秋

重闡將敬於朝夕軫萬民之疾苦水旱預籌勵百爾之勸  
懲賢愚立辨赦愆宥罪仁風廣被祥刑發帑蠲租豐  
歲頻聞減賦時邁歌而黃淮底定清問及而稼穡周  
知闕里隆九拜之儀考亭躋十哲之列科目以增加  
而益盛士子因訓飭而交修

聖自多能心猶好學總百家之闡奧垂千古之典謨經天

緯地之文一貫萬殊之理禹鼎湯盤之句龍翔鳳翥  
之書莫不薈萃并包商皇典麗至於

皇威遠暢廟畧遐宣臨邊塞而萬幕傾心示神謨而三孽  
授首察哈爾不敢伏莽厄魯特頓爾傾巢俄羅斯稽  
顙以奉共球烏斯藏望風而銷鋒鏑以至波澄紫海  
籌靜紅苗雨露及於天維疆索通於地紐清寧合撰  
參兩大以成能覆載同流兼三才而立極武功文德  
前代之所未聞聲教車書史冊之所未覩建中錫福  
久道化成萬物逸而

宸衷弗釋其勞四海寧而

皇躬弗辭其瘁六十一載豐功厚澤深浹人心四千餘年



哲后賢君難侔曆服紫壇紺幄知

天意之同符蒼璧黃琮思德馨之並薦朕纘承丕緒永念前徽我

皇考聖祖仁皇帝允宜崇祀郊壇克配

上帝以後冬至祈穀祭

天俱奉

聖祖仁皇帝同

太祖高皇帝

太宗文皇帝

世祖章皇帝配享夏至祭

地亦如南郊祈穀禮祇奉配享兵應行禮儀爾部詳議具

奏

初八日

諭順天府府尹鄉飲酒禮乃敬老尊賢之古制近聞年久視為具文所備筵宴亦甚不堪爾衙門應加謹舉行

十一日奉

上諭查驗八旗器械甚屬緊要從前查驗時彼此那借及租箭呈驗之處朕所深知現今日期已近若今年查驗器械勢必竭蹶租賃糜費兵丁銀錢殊為無益今歲不必查驗著勒限一年令將器械修理完固預備朕於明歲十月間遣信任大臣會同兵部務令一



日查驗一旗驗畢封貯公所再驗一旗將二十四旗盡行驗畢交還各旗方無那移租箭之弊著將此曉諭八旗令各預備

又

諭戶部巡撫裴率度因起蛟水泛請捐俸工賑恤被水居民等語各省督撫偶遇地方有事俱卽請捐俸工殊非正理俸工特爲贍養伊等家口而設縱將通省官俸捐助爲數無幾有何裨益至若工食盡行捐出胥役人等又何以應差行走如果民遇災祲該督撫卽應奏聞動支正項錢糧若小有水旱或些須修理隄岸城垣該地方大小官員有願出已資捐助効力者何必具題卽欲報聞亦止可另行繕摺具奏該部行文直省督撫凡地方遇有公事奏請捐助俸工之處著永行停止

又理藩院奏請賑濟扎魯忒貝勒魯空等三旗乏食人等奉

上諭著再給銀二萬兩交與本錫阿林保齋往此項爲恐從前發去銀五萬兩或有不敷添解備用竝非分別此一旗給與若干彼一旗給與若干也可將兩次銀兩合數旗之人通同散給如有不敷再行請旨十六日戶部將江蘇所屬蘇太等衛舊欠項下不應蠲免銀兩請



旨奉

上諭此民屯地丁等銀三百五萬九千餘兩內地租等項銀六千八百七十餘兩雖不應豁免但此事歷年已久實欠在民著一併豁免

十七日議政王大臣等議准浙閩總督滿保奏請修築海寧塘堤奉

上諭錢鏐時所築塘堤中間雖被冲壞至今尚有存者數年來督撫等所修塘堤俱虛冒錢糧於不當修築處修築以至隨修隨壞又聞赭山有三處海口今一處淤沙壅塞水不通流若濬治疏通使潮汐不致留沙壅塞則海寧一帶塘工方可保固言之者雖未必稔知然不可不留意抑或地方大臣恐糜費錢糧此等處雖明知而不顧也爾等傳諭該督撫知之

十九日

諭大學士等朕近於

聖祖仁皇帝所遺書笥中檢得未經頒發

諭旨一道以明太祖崛起布衣統一方夏經文緯武爲漢唐宋諸君之所未及其後嗣亦未有如前代荒淫暴虐亡國之跡欲大廓成例訪其支派一人量授官職以奉春秋陳薦仍世襲之朕伏讀之下仰見我

聖祖仁皇帝海涵天覆大度深仁遠邁百王超軼萬古朕思史記東樓詩歌白馬商周以來無不推恩前代後



世類多疑忌以致歷代之君宗祀殄絕朕仰體

聖祖如天之心遠法隆古盛德之事謹將

聖祖所貽

諭旨頒發訪求明太祖支派子姓一人量授職銜俾之承襲以奉春秋祭享但恐有明迄今年代久遠或有奸徒假冒致生事端爾內閣大學士卽會同廷臣詳明妥議以副

聖祖仁皇帝寬仁矜卹之至意

二十日奉

上諭從前

皇考將公主郡主等下嫁嫁與蒙古者欲其撫恤蒙古之屬

下人也今公主郡主等不知體恤往來行走整年居

住京師兩處安家蒙古甚爲勞苦嗣後欲來京師著

先請旨得旨後方可來京不請旨者不得來京

二十二日直隸巡撫李維鈞奏請直隸省地方丁

隨地起戶部議准奉

旨交與九卿詹事科道會同確議具奏九卿等奏應行

令該撫確查各州縣田土因地制宜作何攤入田

畝之處分別定例庶使無地窮民免納丁銀之苦

有地窮民無加納丁銀之累奉

上諭巡撫李維鈞條奏丁隨地起一事九卿竝不據理

詳議依違瞻顧皆由迎合上意起見卽如本內有地



窮民一語既稱有地何謂窮民不與有米餓莩之語相似乎不但此也凡九卿會議理應將所議事件預先詳審至臨議時各出已見平心靜氣同商確以求至當邇來九卿坐班多有不齊及至會議彼此推諉不發一言或假寐閒談遲延累日令一二科道新進者昌言於衆便羣相附和以圖塞責在九卿遲延一日內而六部八旗外而各省俱因以遲延矣以此爲居官安靜及至保舉議行事件又有請託賄賂等弊爾等在

聖祖時皆受

朕恩不圖實心報効每爭迎合有時依議准行便謂迎合得計遇有駁回事件雖加嚴劄又謂上有深意以此事君負恩殊甚此皆朕之所深知而不忍見者

聖祖與

天相似諸臣豈能以人意揣度

天心所有種種惡習皆在

聖祖洞鑒之中包涵已久有何益處朕卽位以來將此等惡習槩置不究爾等自揣平日所爲亦當知懼亦當知感矣今仍欲迎合朕意朕於諸事本無成見有何迎合之處所發會議事件原欲與衆共商卽書所云汝則從龜從筮從卿士從庶民從之意也元首股肱誼同一體朕祇欲諸弟盡爲賢王諸臣盡爲良臣事



事當理卽朕意耳朕從不自以爲是所議允當朕卽不從不妨面折廷諍再三執奏卽不顯言亦可密摺敷陳至爾等以堯舜比朕朕果能上法堯舜乎抑屬贊頌之詞也如或不能正可因此自勉卽爾等亦當上法古名臣也

聖祖

良法美政布在方策朕與爾等期共相勗勉以臻至

治朕宵旰勤勞爾等可圖安逸乎嗣後務宜洗心滌慮痛改前非凡事皆持公正止論是非毋事揣度朕實心延納果能據實直陳豈肯拒阻若仍蹈前轍朕或據理飭行或擇人另議爾等豈不自愧乎原本發還九卿著仍照戶部議行

二十六日禮部請定取中進士名數奉

上諭今科進士照朕所定一百八十名之數入榜取中仍降旨與總裁官朱軾張廷玉此外不拘省分不限額數有可取佳卷選出另行具奏放榜後其落卷照今春檢閱之例檢閱

二十八日湖廣總督楊宗仁奏請定百姓食鹽價值奉

上諭據楊宗仁奏請欽定鹽價伊並不體察事理但固執伊所原題具奏朕視民商皆屬一體如何定奪士農工商雖各異業皆係國家子民理當一視同仁督撫偏袒百姓巡鹽御史偏袒商人可乎總督係地方



大臣凡辦理事務必須平心靜氣期於合理楊宗仁  
身為總督於此等處並不留意混行賣奏殊溺大臣  
之職著黃叔琳謝賜履前往楚省會同楊宗仁將鹽  
價作何酌定之處確議具奏謝賜履印務著何順暫  
行署理

二十九日

諭大學士等人臣膺命効職果能實心愛民清白自矢  
則官去民思甘棠留詠有愈久而不能忘者從古有  
之若今之生祠書院不知始自何人自督撫提鎮以  
及監司守令所在多有究其實不過官員在任之時  
或係下屬獻媚逢迎或地方紳衿有出入公門包攬

詞訟之輩倡議糾合假公派費佔地興工甚至圍圍

亭臺窮極華麗勞民傷財一無顧惜及其後或為宴  
會遊玩之場或本官竟據為產業考其年月則官員  
去任之後百姓追思而特為興造者甚少此事向曾  
禁止而踵弊如故當再為嚴飭嗣後如有仍造生祠  
書院者或經告發或被糾參即將本官及為首之人  
嚴加議處其現在之生祠書院如果係名宦去任之  
後民間追思蓋造者准其存留其餘俱著地方官查  
明一槩改為別用或為義學延師授徒以廣文教如  
此則以無用為有用惜民財力杜絕虛浮於地方風  
俗大有裨益



又理藩院奏陣亡台吉進達克  
恩加卹典伊子噶爾馬策布騰等謝  
恩奉

上諭蘇尼特王垂濟拱蘇勒本旗下台吉管理旗務官  
進達克帶領伊旗下兵丁與逃竄之厄魯特羅卜藏  
錫拉珀等鏖戰身亡甚屬可嘉此並非出兵亦並未  
令其率衆追擒伊即率領兵丁前去在陣身亡是以  
朕交部議敘部議二等台吉加一等授爲頭等台吉  
具奏朕會特降諭旨施恩將進達克照依公爵致祭  
今襲頭等台吉進達克之子噶爾馬孫多布著授爲  
輔國公伊第二子噶爾馬策布騰亦會奮勇對敵受  
傷著授爲頭等台吉第三子共格垂穆皮爾亦會臨  
陣著授爲二等台吉

三十日

諭內閣朕惟我

太祖高皇帝天錫智勇肇造鴻基

太宗文皇帝繼業恢圖布昭聖武

世祖章皇帝統一寰區功成治定其時內外文武勲舊臣  
工戡亂効力茂著厥功

皇考聖祖仁皇帝特勅內閣翰林院諸臣纂修  
三朝國史用揚

列聖之鴻謨並及諸臣之勞勩迄今尚未編輯矧惟



聖祖仁皇帝垂統六十餘年以守兼創  
恩澤聲教遠及海外絕域

德業之盛超於百世凡於指授所及能顯立功勳誠敬任  
事之大臣與夫軼羣出衆有才之人若不及今博採  
聞見薈萃成編恐閱世久遠或致闕畧著將國初以  
來文武諸臣內立功行間誠敬任事卓越之才有應  
傳述者行文八旗將諸王貝勒貝子公以及文武大  
臣之冊文誥勅碑記功牌家傳等項詳加查核暨有  
顯績可紀者亦著詳察逐一按次彙成文冊悉付史  
館刪去無稽浮夸之詞務採確切事實編成列傳如  
此可以垂之萬世庶為國家宣力有功之大臣不致  
泯沒



雍正元年十月

上諭十八道

初三日

諭歸化城都統丹晉及兩旗官兵前者

聖祖皇考出寧夏親征漠北時巡狩歸化城地方見爾等  
歸化城土默特兩旗官兵士衆委靡弓馬不習法度  
日以廢弛因將兩旗都統革退另選在京都統副都  
統叅領等員管轄歷年訓練有方軍律嚴整舊習漸  
改有志向上是以數年以來選用在京人員之例已  
經停止今爾保送之官兵人等盡皆弓馬嫻熟且兩  
旗兵弁行伍整齊凡有行圍及出征等事與內地兵

雍正元年十月



丁一體効力此皆我

皇考教育爾等所致也歸化城土默特兩旗原在四十九  
扎薩克內其都統副都統等官皆係國初歸附之士  
默特功臣子孫世職今念爾等既已棄咎從忠允宜  
遵復舊例楚宗著授京城額外都統楚宗員缺將原  
任都統阿必達之子副都統良敦補授良敦員缺著  
丹晉將爾兩旗內應補人員與原任都統副都統世  
家子孫及叅領內人材可用儀表修偉向能管轄兵  
丁曾經効力行間人等查明保送引見朕將親擢焉

初四日

兩總理事務王大臣各部院衙門無品筆帖式往往遲

至二三十年始得陞授小京官等等在部院効力年  
久不得一職甚屬可憫著大學士學士翰林院掌院  
學士會同吏部將伊等與候補之筆帖式等一同考  
試擇其文理優長者給與品級嗣後三年一次考試  
其優等者俱著給與品級

初五日

諭兵部驛站關係重大經朕屢加嚴諭然其間積弊難  
以盡詰有在官之累有在民之累如直隸山西等省  
差徭更爲浩繁雖驛馬足數亦供應不敷乃內而兵  
部外而驛道於給發馬匹時官吏通情受賄往往所  
給浮於勘合之數且行李輜重皆令驛卒乘馬背負



多至八九人不等所到州縣以見馬換馬向有舊例不敢詰問至督撫提鎮經過之處更唯命是從嗣後照勘合之外有敢多給一夫一馬者許前途州縣卽據實揭報都察院以聽糾叅如甲縣容情不揭而乙縣揭報者並甲縣一併治罪其督撫提鎮騷擾驛遞者皆照此例庶少甦在官之累至若河南山東諸省離京稍遠謂耳目易欺每驛額設馬匹不過十存三四其草料工食仍照舊開銷且逐年詳報倒斃侵蝕補買之價差使一至則照里科派將民間耕種牲口強遣當差令其自備物料跟隨守候種種累民尤屬不法著該地方督撫將所有驛站逐一徹底清查缺額者勒限補買至派借民間牲口尤當勒石永禁違者卽從重治罪

又

諭內務府直隸省州縣亦可與爾衙門文移往來如莊頭人等有在州縣地方生事者著該州縣官員竟行呈報爾衙門爾等查問訓飭若不悛改卽行斥革著行文直隸巡撫凡有皇莊州縣地方遍行曉諭至各莊頭交糧時須逐一查問將生事之人嚴加訓飭不肯悛改者卽行斥革

又兵部奏山西出征兵丁倒斃馱載輜重馬匹應令賠補奉



上諭山西兵丁遠馳異域甚屬勞苦其倒斃馱載輜重馬匹著照川陝例免其賠補

初六日奉

上諭前差連肖先往河南賑濟回京時朕諮以河南官員賢否據奏俱屬不及無一賢員朕因特選七員命往石文焯應將劣員卽行叅革其員缺卽應以命往人員補授乃徇庇優容並不將不及劣員查叅只將陞任丁憂病故等缺以命往人員擬補具奏殊屬不合督撫係封疆大吏地方有劣員應卽叅革倘優容不行題叅留任一日則地方百姓受害一日外省大僚果能自禪忠誠何致轉畏屬員著行文嚴飭石文焯伊屬員內若果無庸劣盡是賢能著以五人輪次來京引見

又湖廣總督楊宗仁審擬原任桂陽縣知縣董瑞受賄一案仍照原題擬流援赦刑部議駁具奏奉  
上諭依議部駁事件督撫每固執原題具奏一經駁回往返遲誤干連人等多至受累嗣後部內應駁事件督撫若固執原題具奏部內卽將督撫一併議處奏聞如不應駁事件而部內故求疵隙題駁該督撫卽將不應駁之情由奏聞

初八日奉

上諭在京八旗及外省兵丁凡係三年以內從征自軍



前回者無庸議及如久在行間裁減撥回者除現在當差行走之人外其因衰老有疾革退人內或其子弟錢糧可以倚賴或其產業尙足自給者不必併查若本身不能當差又無可倚賴之人著各該管官逐一詳查彙奏賞給伊等半分錢糧養贍終身

又禮部奏孝行節義既經設立祠宇其建坊銀兩應請停給奉

上諭孝行節義建立牌坊年久毀壞遂致湮沒今欲設立祠宇特爲昭垂久遠之意並非欲節省錢糧部議建立祠宇停給建坊銀兩不合建坊銀兩仍著給與

十一日

論內閣九卿詹事科道從來用人之道必兼聽並觀疇咨博採方能允當而無失朕於選用人員每諮訪卿等正以朕一人之耳目有限不若合爾諸臣之見聞始無遺漏爾等僉云未能深知互相推諉夫盈廷諸臣各省之人咸在同鄉親故豈無確實見聞其賢者卽有小善亦應稱舉其不肖者卽有小惡無容隱匿若知其賢而不言是謂蔽賢知其不肖而不言是謂黨惡卽如九月分選官摺內有劉尙儉者係四川夔州府叅革貪酷知府劉天觀之子其父刻剝小民之脂膏爲伊子捐納罪莫大焉如此之人豈可錄用在廷豈無一人知之者乃俱緘默不言以此推之可見



知而不言者甚多爾等之意惟恐結怨於朋友遂容  
隱不肖以保全其功名雖誤朕選用之事而不顧貽  
害於地方而不恤試思得罪於朋友與見棄於君父  
孰重而孰輕全一人之功名與貽地方之患害孰大  
而孰小况卿等所舉之賢不肖朕不過於引見時借  
以叅酌自有裁奪并欲知薦者之居心與知人不知  
人所舉賢者亦只據現在有善可稱非責爾等保其  
終身無過不必過慮後日之貽累嗣後務宜痛改積  
習苟有見聞卽從實舉出進賢勿避嫌退不肖勿避  
怨朕生平惟以真誠待人卿等何必瞻徇疑畏當以  
至誠報朕尙其各抒忠悃勿負朕推心置腹之至意  
庶用人得其道而吏治日隆矣

十五日奉

上諭嗣後凡查富戶將從外任丁憂及無罪致仕回京  
者永遠免其行查如一併行查徒令不肖都統叅領  
等借端取利於事甚屬無益且將伊等俱派富戶則  
人如何能作好官自降旨之後若仍有索詐等情定  
行治罪

十八日歸化城都統丹晉奏報圖思海運米駝隻  
從大同至歸化城八百四十八隻內損壞一百七  
十五隻奉

上諭此項駝隻皆因圖思海等運米時不加意牧養以



致殘疾癱瘓數日之間損缺甚多如將此等駝隻交與察哈爾土默特蒙古人等必致倒斃又復責令賠償蒙古人等殊覺枉抑朕早已洞悉此情恐其擾害蒙古特遣副都統勒什布前往令於交駝時將殘疾者盡行記檔此項損傷駝隻既係圖思海之故應俱著落圖思海賠償

十九日

諭大學士等國家建官分職於翰林之選尤爲慎重必人品端方學問醇粹始爲無忝厥職所以培館閣之材儲公輔之器也從前

聖祖加意育才循循訓導又纂修各種書籍需員甚多故

翰林院編檢幾至二百人庶吉士亦五六十人朕臨御之初未有編纂諸事又未能如

聖祖之善於訓導誠恐人才置之閒散特多方錄用內而科道吏部外而道府州縣俱各隨材器使務令疏通今編檢尙有百餘人庶吉士尙有數十人著內閣大學士會同翰林院掌院教習秉公別擇其學問優長字畫端楷或精於翻譯國書者留本衙門辦事及分各館纂修其或才具練達可當科道吏部之選或長於吏治編檢可爲道府庶吉士可爲州縣者一一分別具奏至或老病衰廢願自解退者聽其以原官休致其有行止不端事蹟確實者奏聞革退今朕特恩



開科人材輩出將來揀選庶常朕當親加考試引見  
揀選至日後散館仍照舊例以三等分用目今正屆  
殿試之期朕深知向有擬送策聯鑽營甲第等弊殊  
可痛恨朕所點閱卷大臣俱係平日實心委任之人  
各宜虛公謹慎杜絕諸弊倘有仍蹈前轍者必嚴加  
處分務使文治日隆英才蔚起以副朕籲俊興賢之  
至意

又總理事務王大臣議奏旗丁掛欠米石應令總  
漕議定搭運年限再將弁丁發南追比奉

上諭康熙三十八年至五十年止掛欠者盡行寬免五  
十一年至五十八年掛欠者暫停併追五十九六十

六十一年掛欠者如果幾年之內能一齊賠還朕亦

施恩寬免如仍延挨不肯竭力交清將新舊一併嚴  
追將此諭旨併所議之處作速行文總漕張大有俟  
議奏時議覆

二十日

諭總理事務王大臣今年殿試在十月二十七日天氣  
已寒諸貢士若照舊例在丹墀對策恐硯池冰結難  
於書寫此一次著在太和殿內兩傍對策再傳諭總  
管太監令多置火鑪使殿內和煖諸貢士得盡心作  
文寫卷

二十二日戶部奏陝西省長武西鄉二縣浮糧仍



照例徵收奉

上諭長武西鄉二縣浮額錢糧屢年徵收甚累百姓著予豁免

二十六日

諭戶部朕自御極以來宵衣旰食無日不以民依爲念督撫以下守令以上凡有地方之責者均宜公忠體國仰副朕心今年夏月朕以北省二麥歉收差員到南省於秋成後採買米石以備賑貸平糶朕意切於爲民正欲酌盈劑虛以羨補不足也又恐有不便於民之處於差員臨行之時再三申諭地方米多方可採買不必定要買足今聞各省地方官因欽差買米禁止商販不許出境大負朕痼瘼一體之意甚屬不合況浙江及江南蘇松等府地窄人稠卽豐收之年亦皆仰食於湖廣江西等處今秋成歉收若商販不通必致米價騰貴該部速卽行文各省總督巡撫凡有米商出境任便放行使湖廣江西安慶等處米船直到蘇州蘇州米船直到浙江毋得阻撓庶幾有無流通民皆足食以副朕愛養元元之意

又

諭工部琉璃瓦兩廠官地每月按間計標徵租相沿已久朕念兩廠多係流寓賃住貿易小民情可憫惻嗣後止徵地租免其按間計標逐月輸納著卽通行



曉諭以副朕撫恤窮黎至意

雍正元年十一月

上諭十七道

初六日兵部議奏叅遊等官丁憂給假定限十箇月奉

上諭所奏亦是但尙未詳盡今直隸人亦有在雲南居官者雲南人亦有在直隸居官者亦有近本省居官者一例給假十月可乎其丁憂給假之處亦不得預定且無論何人聞訃莫不急遽一定假期必致將任內事件不交代清楚草率離任武職防禦甚屬緊要從前武職俱著在任守制必有深意嗣後給假部內應酌量其遠近定限其丁憂之員所防守地方有無



緊要與應否給假之處著該督撫提鎮聲明具奏有應給假者朕方准行不可預定此本著發回再加詳議具奏

又兵部尚書盧詢條奏請定捕盜官役勸懲及窩主之罪九卿詹事科道議奏請立捕役賞格窩主發遣黑龍江奉

上諭此議尚未詳盡從來盜案內盜首脫逃尚未緝獲或報以病故者甚多如何使盜首必不漏網並盜案亦不致稽遲之處應再加詳議再所擬窩主之罪尤未允協其窩主有窩強者有窩竊者有知情者有不知情者有分贓者有不分贓者律內按罪分別立

決監候斬絞以至杖笞開載甚明今一槩議為發遣

黑龍江地方可乎又所議獲盜過半免其治罪於過半之外拏獲一名賞銀十兩等語夫獲盜過半免其治罪足矣於過半數外拏獲一二名亦何賞之有卽賞亦不過地方官酌量行之以示鼓舞又何得預定所賞之數著落地方官令其捐出乎此本著發回再行詳議具奏

初八日大學士馬齊等奏京口將軍印務已經奉旨著李杕署理悞將張天植自陳本擬票簡用副都統署理京口將軍印務字樣請將臣等交部議處奉  
上諭忠君愛國之心發於至誠凡事自然不致舛錯遺



漏惟思竊位沽名趨利避害僥倖於萬一而於國家  
制度政事輕重絕不加意茫然不知豈不貽笑於世  
國家政事皆

皇考所遺朕年尚壯爾等大學士所應爲之事尚可勉力  
代理爾等安樂怡養心力無耗得以延年益壽是亦  
朕之惠也此等小事猶非所重但能各守君臣大義  
使朕不致恐懼疑惑便是國家之福朕之所望於大  
臣者於一切利欲之心勉自克制精白乃心維持國  
家大體不使吾朝君臣貽譏於萬世朕之所望足矣  
若欲以機心行機事思以惡名歸之於朕朕斷不能  
受爾等徒用心於無用之地耳君臣一體尚其思之

初九日

諭大學士等古制凡廟諱文書式但於本字內缺一筆  
不改易字樣朕於

聖祖仁皇帝聖諱二字每見卽感痛於心昨偶閱時憲曆  
二月月令內見

聖諱上一字不覺失聲長慟嗣後在京各部院衙門及八  
旗在外各省將軍副都統督撫提鎮司道府州縣衛  
凡奏章文移遇

聖諱上一字則寫元字遇

聖諱下一字則寫燬字爾等交與該部卽遵諭行

十一日



諭戶部浙省偶值秋旱其被災地方已降諭旨蠲免錢糧令有司加意撫綏查杭嘉湖所屬被災十四州縣應額徵漕米三十二萬石朕思荒歉之歲民間納米爲難著令徵收一半改折一半俾地方多存正米十六萬石又有耗米若干旣可以濟民之食又可以紓民之力於閭閻大有裨益其改折之價著照康熙九年例每米一石折銀一兩按限解部又念被災之後所交米色未能純一其十六萬石漕米著令紅白兼收以示朕軫恤地方格外施仁之至意爾部卽遵諭行

二十一日奉

上諭爲治之道在於務實不尚虛名朕纘承丕基時刻以吏治兵民爲念事無大小周思詳慮求其見諸施行實可以有濟天下者必下諭旨諄諄告戒中外條奏有當理者無不嘉與採納所冀內外臣工實在遵行庶有成效一年以來所降諭旨及內外條奏頒發於六部九卿八旗直隸各省者亦已多矣內外衙門於奉到事件若不過行一文書出一告示徒托空文竟不見諸實事則不徵不信豈朕倚毗相助爲理之至意歟倘所降諭旨及條奏准行之事其中果有一二未盡允協宜加損益者自當據實入告著通行曉諭六部九卿八旗及各省督撫提鎮凡從前所降諭



旨及條奏議行事件皆令於來年十二月將各條各款實在如何施行及行之如何已有成效條分縷晰明白奏聞至有密奏密降諭旨者仍詳悉密封奏聞朕之所以寬其限者欲俾各得悉心體究斟酌施行於吏治兵民實有所濟各宜砥礪以副朕懷

又

諭禮部

孔子道冠古今爲萬世師表薄海內外無不俎豆尊崇國學乃四方表率其制尤重

聖祖仁皇帝臨雍釋奠典禮優隆朕纘承大統景仰先型羹墻如見念國學爲造士之地聖教所被莫先於此

恐歷歲既久有應加修葺之處爾部會同工部詳加

閱視凡

文廟殿宇廊廡及講堂學舍務須整理周備俾廟貌聿新以申景慕朕將親詣焉

又刑部等衙門以盜犯陳謀等分擬斬決發遣具奏奉

上諭曰

皇考如天好生凡大盜事件按律俱應立決者並交與大學士會同三法司議將造意爲首及傷殺人者一二入正法餘俱減等發落今此案大盜陳謀等聚黨連劫七家殺傷人命情甚可惡著大學士會同原議大



臣將同行連劫七家及情屬可惡者再行逐一詳察  
議奏

二十二日奉

上諭庶吉士散館滿漢試卷著隆科多張廷玉張伯行  
登德閱看具奏從前已將庶吉士內揀選分用此內  
或更有才堪外任及可任部員者爾等會同朱軾分  
別具奏朕思編檢庶常乃清要之選必須學問優長  
人品端方始為稱職若品行有虧雖文藝可觀亦無  
足取爾等再問塞楞額鄂爾奇文岱王國棟伊等如  
知其學問優劣人品賢否之處亦據伊等所知具奏  
至今歲所中進士爾等務悉心察訪必得文行兼優  
之士擢為庶吉士將來始可以收得人之效其餘散  
進士聽各修書館總裁等有知其學問有用者即著  
伊等指名題取効用雍正元年特開恩科所拔狀元  
于振等應格外施恩將于振即授翰林院修撰戴瀚  
楊炳俱即授翰林院編修二甲第一名張廷珩即授  
翰林院檢討俱著在南書房行走

二十五日

諭宗人府大學士領侍衛內大臣九卿等怡親王於  
皇考時敬謹持身廉潔立品未嘗圖利干預一事糾黨邀  
結一人所屬人員畧無擾累不似其他無知弟輩種  
種致煩



皇考聖心其安分自守家計空乏舉國皆知朕素崇獎自朕御極以來一心戴朕克盡臣弟之道所交事務悉効公忠亦衆所共知也查從前朕弟兄分封之例總計各得錢糧二十三萬兩朕欲援此例賜之王以十萬儘足奏辭不已朕勉諭再四王僅受十三萬兩而已再照裕親王例令支官物六年王又摺奏朕不准所請王叩首固辭極其懇切較之弟輩中數人罔知自愛在

皇考時不知恩不知足百計盜取國帑者當作何分別也朕欲以王之善表揚於衆以愧無知諸弟且爲後日子孫模範故特諭諸王大臣今不允王之所請既不可得允王所請則超軼尋常實心爲國宣力之弟轉不得以諸弟兄應得之分賜之朕心實爲不忍殊難裁奪著諸王大臣議奏

又禮部奏冬至令節於皇后前進箋行禮儀注奉上諭朕舉行冬至慶賀禮因

聖祖配

天大典諸王大臣強之再三朕不得已從之皇后前上箋慶賀之禮過三年舉行二十七日奉

上諭殿試武進士著兵部酌定考期具奏考試之日清



晨寒冷著於辰時預備朕於巳時臨試著茶房膳房預備考試人員食物如是日大風甚寒兵部具奏改期此次考試乃朕元年加科恩例伊等自外省來者甚多適遇冬寒著每人賞銀四兩為整理衣服賃取馬匹之用

又兵部以考選軍政具奏奉

上諭此係初次考選爾等秉公考驗此官員內有出兵効力行走年老俸深者諸事尚能坐理仍著留任如果不堪方行革退再人雖年老衰頹不宜留任而出兵効力之處甚多將伊即行革退致令無以度日深屬可憫似此等者另行分晰具奏朕自加恩其雖無効力行間之處而供職年久者伊等身逢太平之世何啻得經歷戰陣爾等亦宜留心朕若不下此旨爾等不敢如此驗看

二十九日

諭大學士等向來庶吉士學習清書散館之後每至荒廢以三年學習之功置之無用殊為可惜嗣後清書散館之翰林不可令其荒廢今年新科進士選拔庶常朕意學習清書者少派數人令其盡心學習務期通曉散館後亦不可荒廢或在翰林或在部曹即令與滿員一同繙譯如此方實有裨益新科進士於引見之前朕欲先行考試知其學問再行引見選拔庶



人才不致遺漏目今天時寒冷考試之日一應仍照  
殿試預備考試題目朕將詩文四六各體出題視其  
所能或一篇或二三篇或各體俱作悉聽其便

又

諭八旗大臣副都統祁爾薩條奏內稱欲裨益於兵丁  
生計故於喜喪之事俱加恩賜臣愚以爲從前滿洲  
人等遇有喪事親友饋送粥茶弔慰後因風俗漸弛  
至有多備豬羊大設餽饌送飯者官兵競相做法不  
計產業過事奢靡等語夫饋粥一事乃我朝滿洲人  
篤於居喪至廢飲食是以親友相恤特饋粥以食之  
並非筵宴也但此禮沿行至今失其本意竟至過爲

修費昔廉親王允禩值伊 母妃之事欲沽取孝名

詭爲孝行迨至百日猶令二人扶掖匍匐而行於定  
例外加行祭禮每祭焚化珍珠金銀器皿等物蕩盡  
產業求異於人其令人扶掖而行至半年者係何意  
見何以至此迄今思之終不可解朕於是時曾恐允  
禩致殞其生特加憐惜及事畢畧無衰損愈覺充肥  
由此觀之其專事狡詐明矣彼時曉事之人多有厭  
憎而譏議之者敦郡王允禩郡王允禴貝子允禔三  
人相結指稱送飯大設席百十日之內輪流饋送日  
用豬羊二三十口備極餽品四人門下人等每日筵  
宴紛擾不但朕知衆人無不知之也且允禔等曾以



與允禩送飯會同朕躬以允禩如此詭詐沽名而無  
知之人遂謂允禩爲甚孝以致舉國喧傳此亦衆人  
所共知也惟我

皇考洞見其情曾於衆阿哥會集時

諭曰孝必本於誠心如欲邀孝名卽爲虛僞卽爲不孝爲  
人子者不務盡孝於父母生前而欲矯飾於歿後譬有  
乞丐於此告之曰爾死我爲爾焚化金銀累萬彼乞丐  
亦只欲生耳斷無羨死之心也以之指責允禩者屢矣  
朕當

皇考

皇妣大事惟遵

皇考當

皇祖考

皇祖妣大事時所行儀禮外不敢借稱盡孝稍有詐取名  
譽過爲矯飾之處論語云禮與其奢也寧儉喪與其  
易也寧戚朕前曾降諭旨著大臣等查考喪禮定爲  
儀節具奏已經十月尚未議覆今朕欲協諸經書義  
理期有裨於旗人生計將副都統祁爾薩所奏准行  
但恐衆人謂朕抑制伊等使居喪不得備禮有礙於  
子孫盡孝之心親友相關之誼如有礙不准祁爾  
薩所奏又恐不協經書義理無裨於旗人生計是以  
朕尚疑而未定著各部及八旗大臣等會同詳議具



奏至從前所交議奏之旨經至多日大臣等尚未議  
奏必有不便施行之處大臣等不敢直陳朕恐悞降  
諭旨心甚疑焉如果有不可行之處將旨繳回 大  
臣等遵

旨議定條例具奏奉

上諭凡作偽飾詐以取虛名係朕平日所羞爲者且自

太祖

太宗

世祖

聖祖以來歷代相繼專務誠實撫天下之萬民登國家於  
平治毫無粉飾之政諸臣咸當恪遵我朝制度崇尚

實行鄙薄虛名此所奏 知道了將兩次所降諭旨一  
併傳示八旗徧令遵行

又奉

上諭前將怡親王奏摺交王大臣等議奏王又屢次奏  
辭力求允其所請朕尚難於酌定想王大臣等自難  
定議今除喂養馬匹外俱著照所請以副王謙抑之  
懷朕另行加恩將現在王所兼管之佐領俱令爲王  
之屬下賞給頭等護衛四員二等護衛四員三等護  
衛十二員共添護衛二十員加賜豹尾槍二長桿刀  
二每佐領下添給親軍二名王大臣等若謂理宜如  
此施恩於王卽遵旨行知各該處



雍正元年十二月

上諭十一道

初五日

諭內務府總管等凡爲莊頭之人以力田節儉爲本如李姓鄔索佳等奢侈妄爲俱已獲罪莊頭等當深以爲戒勤農務本躬行節儉教訓子孫讀書守分如果有才能朕自加恩錄用爾等傳諭知悉再莊頭等所居房舍應量其家口所需酌定額數無得恣意僭侈如有仍前諸弊不知服田力穡但以奢靡相尚擅用非分之物作種種兇惡之事及違例廣建房舍者定行正法



初六日

諭八旗都統向者每甲喇止叅領一員因不敷用始委署一員協理昨議政大臣奏稱護軍校驍騎校等官以之委署叅領職卑不勝其任停其委署等語其說亦是今將委署叅領卽改作副叅領秩爲五品嗣後副叅領員缺仍將護軍校驍騎校等官一併揀選引見補用若叅領副叅領奉有差遣其員缺應行委署者奏聞委署如此則責任專而管轄得力由兵丁出身者其陞轉之途亦不致壅滯旗下旣得人材事務亦大有裨益員額旣添効力之人益得上進至現在委署叅領應分別優劣優者授爲副叅領劣者奏明令其各回原任

初七日吏部戶部議覆貴州省奏銷康熙六十一年地丁錢糧經徵全完各官照例議敘奉

上諭貴州通省地丁錢糧不足十萬兩若照此議行僅有經徵各官得邀議敘督催各官雖極爲効力終不能得議敘其督催各官或仍照十萬兩以下一年內全完准行議敘之定例或合併二三年錢糧督催全完始行議敘之處戶部會同吏部定例議奏

初九日刑部等衙門奏臺灣叛寇餘黨劉國華等出洋行劫分別治罪其被盜殺傷之兵丁林光等分別卹賞奉



上諭此本所議賞兵之處甚輕一兵陣亡五兵得傷亦曾殺死二賊伊等攻戰是實應照軍功議敘至收受賊首劉國環杜君英所給劄付仍舊整年藏於吳郡山中同夥俱係叛逆該督定擬斬罪部內議減非是宜將原先不入叛黨後方入夥行劫賊犯另爲查明分別定擬

十一日兵部議奏副將胡友良年老休致奉

上諭副將胡友良曾否立有勞績著查奏再從前軍政時有副將以下官員因老病殘疾不能騎射革退者伊等少年時在軍前曾著勞績今因年老不能騎射以致革退情屬可憫著交與兵部將會在軍前効力身帶傷痕竭力供職之員逐一查明具奏

十五日

諭九卿朕惟靖盜所以安民而欲靖盜必須嚴諱盜之處分併正竊盜之刑法州縣有司因畏盜案叅處顧惜功名往往諱盜不報或以強爲竊或以多爲少或賄囑事主通同隱匿以致盜賊肆無忌憚定例諱盜處分不爲不嚴無如督撫等官全無覺察殊負朕保愛良民之至意再竊賊雖非強劫然行竊日久必至夥劫所以律載竊盜三犯卽絞立法之意原在防微杜漸今各直省竊盜依律究擬者絕少盜案之多實由於此如何使有司不敢諱盜併如何重懲竊盜之



處該部會同詳議具奏

又刑部等衙門議覆河南巡撫石文焯題奏毆死小功服叔之馬洪望擬斬立決一案奉

上諭從前湖廣巡撫張連登所題楊商玉與楊眉望之父楊末公角口楊眉望見伊父被毆將大功服兄楊商玉毆死因此援引救父殺死大功服兄之譚華常改爲免死減等充發之例將楊眉望題請減等朕以

**皇**考在日將此事交與九卿會議減等結案者亦因諒其情由可矜施法外之仁然並不曾著爲定例張連登何得卽引此爲例將楊眉望減等具題故將張連登交與吏部議處今石文焯疏稱馬兆六與馬洪望之

父馬兆謙角口馬洪望因救父將小功服叔馬兆六打死援引救父打死小功服兄之吳育改爲擬斬監候之例將馬洪望應否減等之處聽候部議題請與理頗合部內雖議將所請之處不准仍將馬洪望照例擬斬立決朕念馬洪望因救伊父將馬兆六打死馬洪望改擬斬監候張連登石文焯所題事件情由雖同石文焯援例兩請張連登乃擅自減等具題恐各省督撫不知其故以爲其事相同何以獨將張連登議處且恐其畏罪將此等事不敢具奏嗣後命案有似此情由可矜者仍援例兩請朕閱覽定奪再或有子之人與人角口故令伊子將人毆死者豈可減



等此風斷不可長將此諭旨通行直省總督巡撫

十六日奉

上諭諸路軍前兵丁自軍興以來並皆竭誠効力前朕特降諭旨屢次將老病者撤回寧家現在軍前之人盡屬壯健奉命勤力無一違悞之事甚屬可嘉時值冬寒俱著賞給行糧一月

十七日浙閩總督滿保奏請嚴禁天主教禮部議奏各省西洋人除應送京効力者外餘俱安插澳門奉

上諭西洋人乃外國之人各省居住年久今該督奏請搬移恐地方之人妄行擾累著行文各省督撫伊等搬移時或給與半年或數月之限令其搬移其來京與安插澳門者委官沿途照看送到毋使勞苦

十九日

諭兵部國家保障封疆惟武臣是賴叅將以上責任尤重其年老有疾不能料理以致營務廢弛者自難姑容但其間或有久歷戎行曾著勞績者情亦可憫嗣後叅將以上有老病之員該督撫提鎮照例題叅仍將伊從前行間効力之處查明另繕奏摺夾於本內同送內閣奏聞朕酌加恩典以示篤念舊勞之意

又奉

上諭定例八旗官員等一經革職盡謂之廢官令當勞



苦差役挑取烏鎗馬甲夫革職之人今雖罷黜其未  
革職之前亦曾仰受國恩榮列班聯若果以頑劣無  
恥致獲罪戾此係伊所自取固宜列於廢官令當勞  
苦差役至因公註誤衰老有疾才力不及無心等過  
獲罪人員並非故犯亦列廢官令當勞苦差役情甚  
可憫嗣後八旗革職人等各視其罪之輕重著為定  
例如婪贓枉法虧欠帑項規避怠惰行止不端曠班  
等罪革職之人仍照舊例令當勞苦差役此外因公  
註誤衰老有疾才力不及無心等過革職之人將列  
於廢官挑取烏鎗馬甲及當勞苦差役之處概行寬  
免如此不但現任官員惟恐後日之為廢官敬謹不  
敢輒犯卽因公註誤革職人等雖經卸職尚得改過  
自新安知其日後不仍堪効用也著交該部議奏



